

Երեսնամյա այսպես

ՄԱՅՐ ԱԹՈՒ ՍՈՒՐԲ ԷԶՄԻԱԾՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

Օգոստոսի 21 օր ծննդյան Ամենայն Հայոց Կաթողիկոսի

Օգոստոսի 21-ին Մայր Աթոռ Ս. Էջմիածնի պաշտոնությունը Ամենայն Հայոց Կաթողիկոսի ծննդյան տարեդարձի առիթով հանդիպում ունեցավ նրա հետ:

Նորին Սրբությանը պաշտոնության անունից շնորհավորեց Մայր Աթոռի վարչատնտեսական բաժնի տնօրեն Մուշեղ եպս Բաբայանը՝ մասնավորապես նշելով, որ օրը հատկանշական է ոչ միայն Մայր Աթոռի աշխատակիցների, այլ նաև Հայաստանյայց Առաքելական Ս. Եկեղեցու յուրաքանչյուր հետևորդի համար: Մուշեղ սրբազանն ընդգծեց, որ ներկա-

ծառանում ու շենանում է Մայր Աթոռը:

Ամենայն Հայոց Հայրապետը նշեց, որ Աստուծոց կյանքի պարգև ստացող յուրաքանչյուր անձ ազգին, հայրենիքին ծառայելու առաքելություն ունի, որի նվիրյալ իրագործման մեջ է նա գտնում իր իրական երջանկության եւ գոհունակության ապրումը:

Գարեգին Բ Կաթողիկոսը համոզում հայտնեց, որ մեր կյանքում առկա բազում դժվարություններն ու մարտահրավերները կհաղթահարվեն, արատավոր երեւոյթները կվերանան, եթե յուրաքանչյուր հայորդի իր ծառայու-



թյան բազում տարիներ՝ ազգօգուտ եւ եկեղեցականոր տարակրթական առաքել շենացնելու եւ պայծառացնելու հայոց կյանքը եւ առաքելախիմն Ս. Եկեղեցին:

Ամենայն Հայոց Կաթողիկոսը շնորհակալություն հայտնեց ամենքին ջերմ խոսքերի եւ շնորհավորանքների համար՝ հայրապետական իր օրհնությունն ու գնահատանքը բերելով ներկաներին: Վեհափառ Հայրապետն ուրախությամբ արձանագրեց, որ անցած տարիներին եկեղեցականության ջանադիր եւ միասնական ծառայության շնորհիվ է Հայոց Եկեղեցին հոգեւոր անդաստանում եւ տարբեր ասպարեզներում արձանագրել բազում հաջողություններ: Այս առիթով Նորին Սրբությունը հորդորեց հոգեւորականաց դասին առավել նախանձախնդրությամբ եւ նվիրումով շարունակել իրենց ծառայությունը Եկեղեցուն եւ հավատավոր մեր ժողովրդին:

Ամենայն Հայոց Գարեգին Բ Կաթողիկոսի ծննդյան տարեդարձի առիթով Մայր Աթոռ Սուրբ Էջմիածնում ստացվել են բազմաթիվ շնորհավորագրեր քույր եկեղեցիներից, Հայ Եկեղեցու սպասավորներից, պետական, քաղաքական եւ հասարակական գործիչներից ու աշխարհասփյուռ տարբեր հայ համայնքներից:



ների համար պատիվ է ծառայել Մայր Աթոռում՝ Ամենայն Հայոց Կաթողիկոսի օրհնության ներքո՝ իրենց գործունեության մեջ օրինակ ունենալով Նորին Սրբության անձը, նրա եռանդը, անսակարկ նվիրումն ու սերը Մայր Եկեղեցու եւ հայրենիքի հանդեպ:

Մուշեղ եպիսկոպոսը Նորին Սրբությանը մաղթեց երկար տարիների կյանք եւ անսասան, երջանիկ հովվապետություն:

Այնուհետեւ Ամենայն Հայոց Կաթողիկոսն իր օրհնությունը բերեց ներկաներին՝ շնորհակալություն հայտնելով ջերմ մաղթանքների համար: Նորին Սրբությունը բարձրորեն գնահատեց այն աշխատանքը, որ Մայր Աթոռի պաշտոնությունը կատարում է ամենայն սիրով ու նվիրումով՝ ընդգծելով, որ այդ ծառայության շնորհիվ են արձանագրվում հաջողությունները եկեղեցական կյանքում, տարեցտարի պայ-

թյան վայրում եւ հանգամանքում դրսևորի նախանձախնդրություն եւ նվիրումով կատարի իր պարտքը ազգի եւ հայրենիքի հանդեպ:

Այս մտածումներով Հայոց Հայրապետը մաղթեց ներկաներին, որ Աստված Իր օրհնությունները հեղի նրանց վրա, իրենց կյանքի մեջ հավելի ուրախությունը, որպեսզի ապրեն գոհունակ սրտով եւ, անկախ իրենց հանգամանքից, բարձր գիտակցությամբ եւ պատասխանատվությամբ կատարեն իրենց աշխատանքը:

Նույն օրը Մայր Աթոռ Սուրբ Էջմիածնում պաշտոնավարող եպիսկոպոսները, Մայր Աթոռի ավագ եւ կրտսեր միաբաններն ու տարբեր կառույցներում սպասավորող քահանաներն այցելեցին Հայոց Հովվապետին՝ շնորհավորելու բերկրալի առիթով եւ ստանալու նրա օրհնությունը:



Ամենայն Հայոց Կաթողիկոսն ընդունեց գոհված գինձառայողների մայրերին

Օգոստոսի 20-ին Ամենայն Հայոց Կաթողիկոսը Մայր Աթոռ Սուրբ Էջմիածնում հանդիպում ունեցավ դարաբաղյան հակամարտության ընթացքում մարտական գործողությունների եւ գինդադարի պայմաններում գոհված գինձառայողների մայրերի հետ:

Վեհափառ Հայրապետն իր օրհնությունն ու հայրական սերը փոխանցեց հանդիպմանը մասնակից մայրերին՝ բարձրորեն գնահատելով նրանց ոգին: Նորին Սրբությունն իր վշտակցությունն արտահայտեց, ապա նշեց, որ նրանց զավակներն իրենց կյանքն ընծայեցին հանուն հայրենիքի ապահով ու անվտանգ կյանքի, որպեսզի իրենց մայրերն ու քույրերն ապրեն խաղաղության մեջ, ոտնակոխ չլինեն սրբությունները, եւ երաշխավորվի մեր ժողովրդի վաղվա օրը:

Ամենայն Հայոց Հայրապետը հաստատեց, որ նահատակված գինձավորների հիշատակը նվիրական է ամենքի համար, եւ նրանք իրենց սխա-



րանքով ու հերոսական օրհնակով պիտի շարունակեն հավերժ ապրել մեր ժողովրդի հո-

գում՝ առաջացնելով միմիայն հպարտության եւ երախտագիտության զգացում:

Գարեգին Բ Կաթողիկոսն ընդգծեց նաեւ, որ հայ գինձավորը՝ հայրենյաց սահմանների պաշտպանը, մշտապես իր եւ յուրաքանչյուր հայ եկեղեցականի աղոթքներում է:

Պատասխանելով գինձառայողների մայրերին հուզող հարցերին՝ վերջում Ամենայն Հայոց Հայրապետն աղոթք բարձրացրեց առ Աստված՝ գոհված գինձավորների հանգստության համար, ապա օրհնելով որդեկրույս մայրերին՝ նրանց մաղթեց նույն հայրենասիրական ոգով, որով կրթել եւ դաստիարակել են իրենց զավակներին, շարունակել իրենց կարեւոր առաքելությունը կյանքում:

Հանդիպմանը ներկա էր Մայր Աթոռի արտաքին հարաբերությունների եւ արարողակարգի բաժնի տնօրեն Նաթան արք. Հովհաննիսյանը:

Մայր Աթոռ ժամանած մայրերը Մայր տաճարում ներկա գտնվեցին ս. Պատարագի արարողությանը:

Օգոստոսի 24-ին Մայր Աթոռ Ս. Էջմիածին այցելեցին Հայաստանի Հանրապետության և արտերկրի ռազմաուսումնական հաստատությունների 2016-2017 ուսումնական տարվա շրջանավարտները՝ ստանալու Ն. Ս. Օ. Ս. Տ. Գարեգին Բ Ծայրագույն Պատրիարք եւ Ամենայն Հայոց Կաթողիկոսի օրհնությունն ու պատգամը:

Մինչ արարողությունը Ամենայն Հայոց Հայրապետն ընդունեց ՀՀ պաշտպանության նախարար Վիգեն Սարգսյանին՝ ուղեկցությամբ ՀՀ ՉՈՒ հոգեւոր առաջնորդ Կրթանես եպս Աբրահամյանի:

Պաշտպանության նախարարը Նորին Սրբությանը ներկայացրեց ռազմաուսումնական հաստատությունների 2016-2017 ուս. տարվա ավարտական միջոցառումները՝ դրանց շրջանակում մեծապես կարեւորելով ապագա սպաների այցը Մայր Աթոռ: Նախարարը տեղեկացրեց նաեւ ի նպաստ բանակաշինության իրականացվող կրթական եւ սոցիալական ծրագրերի մասին:

Գարեգին Բ Կաթողիկոսը, ողջունելով Նոր ձեռնարկները, իր հերթին ընդգծեց, որ այսօր ազգի ուշադրության առանցքում պիտի լինեն հայրենյաց պաշտպան հայ զինվորն ու սպան:

Հանդիպման ավարտին Ամենայն Հայոց Հայրապետը եւ պաշտպանության նախարարը հոգեւորականների թափուրով առաջնորդվեցին Մայր տաճար, որտեղ կատարվեց ՀՀ եւ արտերկրի ռազմաուսումնական հաստատությունների 2016-2017 ուս. տարվա շրջանավարտների օրհնության արարողությունը:

Տերունական՝ միասնական աղոթքից հետո Ամենայն Հայոց Կաթողիկոսը հայրապետական իր պատգամը բերեց Մայր տաճարում համախմբված զինվորականներին:

Մայր Աթոռ Ս. Էջմիածինը հյուրընկալեց ռազմաուսումնական հաստատությունների շրջանավարտներին

**Ն. Ս. Օ. Ս. Տ. ԳԱՐԵԳԻՆ Բ
ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ՊԱՏԳԱՄԸ ՌԱԶՄԱՈՒՍՈՒՄՆԱԿԱՆ
ՀԱՍՏԱՏՈՒԹՅՈՒՆՆԵՐԻ
ՇՐՋԱՆԱՎԱՐՏՆԵՐԻ
ՕՐՀՆՈՒԹՅԱՆ ԱՌԻԹՈՎ**

«Ամեն ինչի կարող եմ Նրա՝ շնորհիւ, Ով ինձ գորացրեց»:

(Փիլիպ. Դ 13)

Մեծարգո՝ Նախարար, Պատվարժա՛ն զորականներ, Սիրելի՛ բարեպաշտ ժողովուրդ, Ուրախ եմ մեծապես, որ Տիրոջ կամքով առիթն ունենք Մեր շնորհավորանքն ու օրհնությունը բերելու Հայաստանի Հանրապետության պաշտպանության նախարարի առաջնորդությամբ հայոց հոգեւոր կենտրոնում՝ Մայր Աթոռ Սուրբ Էջմիածնում, համախմբված ռազմական հաստատությունների սաներին, ովքեր ուսումնական շրջափուլն ավարտելով՝



ծառայության պիտի կոչվեն Հայոց բանակում:

Գոհություն եւ փառք ենք մատուցում առ Աստված, որ այս տարի եւս մեր ռազմական կրթօջախները տվեցին հերթական առատ հունձքը: Հայոց բանակի ստեղծման 25-րդ տարեդարձի խորհրդանշական այս տարում դուք ջանադիր ու տքնաջան ուսումնառությունից հետո, ահավասիկ, պիտի համալրեք Հայոց բանակի սպայական կազմը՝ կոչվելով պատասխանատու ծառայության: Դժվարին ու մարտահրավերներով լեցուն է հայ զինվորի եւ սպայի ծառայական ուղին: Հայկ Նահապետի ու Սասունցի Դավթի ոգուց ծնունդ առնող հայ զինվորի խորիստ պատմությունն այսօր մեկ անգամ եւս հյուսվում է ձեր՝ դեռ Նոր-Նոր սկսվող մարտական ուղուն: Մեր պատմության Էջերում Հայոց բանակը եղել է ոչ միայն գեներալի ու ռազմարկադի, մարտական հմտության, ուժի խորհրդանիշ, այլ նաեւ՝ ոգեկերտումի ու առաքինության, քրիստոնեական նվիրական արժեքների եւ հերոսության խտացում:


Այս նվիրական օրը Մայր տաճարի սրբազան կամարների ներքո Մեր հայրական պատգամը, սիրելի՛ շրջանավարտներ, ձեզ տալիս ենք առաքյալի խոսքերով. «Ամեն ինչի կարող եմ Նրա՛ շնորհիւ, Ով ինձ գորացրեց» (Փիլ. Դ 13): Հիրավի, ամեն ինչի, անգամ անհնարին ձեռքբերումների է ընդունակ այն զինվորը, որի հոգին ամրացած է ցանկացած դժվարություն, մարտահրավեր ու խոչընդոտ հաղթահարելու աննկուն վճռականությամբ: Դուք ամենքդ հետնորդներն ու ժառանգներն եք քրիստոնեական հավատի ոգով գորացած հայ փառապանձ զորավարների ու զինվորների: Նրանք իրենց լույս հավատքին երբեք չեն խառնել վախն ու երկմտությունը:

Նրանց ոգու արիության հիմքն էր առ հայրենին եւ առ Աստված ունեցած անսասան սերն ու վստահությունը: Սովի, հալածանքների, թշնամու հարձակումների ու դավերի դեմ նրանք կրկնում էին. «Աստված է մեր ապավենն ու զորությունը» (Սղմ. ԽԵ 1):

Շարունակությունը՝ էջ 3



Նարեկ եպս Շաքարյանի հուղարկավորությունը



Օգոստոսի 20-ին Գյումրիում, կյանքի 85-րդ տարում, երկարատեւ ծանր հիվանդությունից հետո վախճանվեց Մայր Աթոռ Ս. Էջմիածնի երիցագույն միաբաններից Նարեկ եպս Շաքարյանը:

Հանգուցյալ սրբազանի աճյունը օգոստոսի 22-ին դրվեց Գյումրիի Յոթվերջ Ս. Աստվածածին առաջնորդանիստ եկեղեցում, որտեղ, նախագահությամբ Մայր Աթոռ Ս. Էջմիածնի լուսարարապետ Հովհանն եպս Հակոբյանի, կատարվեց եկեղեցու կարգ, եւ բազում հոգեւորականներ ու հավատացյալներ վերջին հրաժեշտ տվեցին Նարեկ սրբազանին: Մյուսյաց թեմի առաջնորդական տեղապահ Մակար վրդ. Հակոբյանը Պատարագ մատուցեց, որի ընթացքում Գուգարաց թեմի առաջնորդ Սեպուհ արք. Զուլքյանը կատարեց հանգուցյալ սրբազանի վերջին օծումը:

Ս. Պատարագին Հովհանն սրբազանն ընթերցեց նաեւ Ն. Ս. Օ. Ս. Տ. Գարեգին Բ Ամենայն Հայոց Կաթողիկոսի խոսքը՝ Նարեկ սրբազանի վերջին օծման եւ հուղարկավորության առիթով, որում ի մասնավորի ասվում է.

«Սիրելիներ՛, տիրությունը մեր սրտերում՝ հրաժեշտ ենք տալիս Առաքելական մեր Սուրբ Եկեղեցու վաստակաշատ եւ նվիրյալ սպասավոր Նարեկ եպս Շաքարյանին՝ ուղեկցելով դեպի կյանքի հավիտենական հանգրվանը:

Լուսահոգի Նարեկ սրբազանը Սուրբ Էջմիածնի հովանու ներքո ստացավ իր հոգեւոր դաստիարակությունն ու կրթությունը եւ խորհրդային հասարակարգի պայմաններում, աստվածամերժության դժվարին տարիներին արձագանքելով տերունական կոչին, ստանձնեց կուսակրոն հոգեւորականի առաքելությունը, որպեսզի իր ծառայությունը բերի հավատավոր մեր ժողովրդին, նպաստի ազգային-եկեղեցական կյանքի առաջընթացին: Հոգելույս սրբազանը երկարամյա գովելի սպասավորություն մատուցեց հայոց հոգեւոր կենտրոնում՝ զբաղեցնելով պատասխանատու պաշտոններ: Նա անդամ էր Մայր Աթոռի վերստուգիչ հանձնաժողովի, նաեւ նվիրյալ ծառայությամբ արդյունավորում էր Տիրոջ Խոսքի քարոզչությունն ու Սուրբ Սեղանին սպասավորությունը՝ տարիներ շարունակ լինելով Սուրբ Գեղարդավանքի վանահայրը:

Եկեղեցու պայծառության եւ ժողովրդի առաջընթացի ու հոգեւոր կյանքի վերելքի նախանձախնդրությամբ՝ լուսահոգի Նարեկ սրբազանը շարունակեց իր առաքելությունը՝ որպես Շիրակի թեմի առաջնորդական տեղապահ, ապա նաեւ՝ Ռուսաստանի եւ Նոր Նախիջեւանի, Շիրակի թեմի առաջնորդ: Մեր ժողովրդին պատուհասած ողբերգական երկրաշարժի օրերին եւ աղետին հաջորդած ծանր ժամանակաշրջանում բարեհիշատակ սրբազանը Շիրակի թեմի իր սիրելի հավատավոր զավակների հետ էր՝ կիսելու նրանց վիշտն ու ցավը, ինչպես նաեւ կարեւոր մասնակցություն էր բերում թեմի քաղաքների ու գյուղերի վերականգնողական աշխատանքների եւ վերաշինությունների կազմակերպման ու համակարգման գործում:

Լուսահոգի Նարեկ եպս Շաքարյանը

դյանը Սփյուռքի Մեր զավակներին եւս իր ծառայությունը մատուցեց՝ սպասավորելով Ֆրանսիայի հայ համայնքներում՝ հայրենիքից հեռու ապրող հայորդյաց ներաշխարհում ամրապնդելով հավատքն առ Աստված եւ սերն ու նվիրումն առ հայրենին: Երկրային իր կյանքի վերջին տարիներին հոգելույս սրբազանը վերադարձավ Մայր Հայրենիք՝ շարունակելով օգտակար ծառայություններ բերել Շիրակի թեմում:

Հիրավի, ցավ է ամենքիս համար Մայր Աթոռի երիցագույն միաբաններից Նարեկ եպս Շաքարյանի կորուստը: Մեր Տերը՝ Հիսուս Քրիստոս, Իր հավատարիմ հետեւորդներին հավիտենական կյանքի ու երանության խոստումը տալով, ասում է. «Ուր էս եմ, այնտեղ կլինի եւ Իմ ծառան» (Հովհ. ԺԲ 26):

Ի խորոց սրտի աղոթում ենք, որ Տիրոջ այդ խոսքի համաձայն՝ բարեգութն Աստված երկնից երանական օթեւաններում լույսերի ու խաղաղության մեջ ընդունի հոգին նորոգ հանգուցյալ Իր սպասավորի՝ Նարեկ եպս Շաքարյանի, արժանի դարձնի հավերժական երանությանն ու խնդությանը եւ Սուրբ Հոգու շնորհներով սփոփանք պարգեւի ամենքիս:

Աղոթք եւ օրհնություն Նարեկ սրբազանի բարի եւ լույս հիշատակին»:

Իսկ օգոստոսի 23-ին Մայր Աթոռ Ս. Էջմիածնի միաբանական գերեզմանատանը տեղի ունեցավ Նարեկ եպս Շաքարյանի հուղարկավորության արարողությունը, որին ներկա էին Մայր Աթոռի միաբանները՝ գլխավորությամբ Ն. Ս. Օ. Ս. Տ. Գարեգին Բ Ծայրագույն Պատրիարք եւ Ամենայն Հայոց Կաթողիկոսի:

Ս. Պատարագի եւ վերջին օծման կարգի ավարտից հետո հանգուցյալ Նարեկ սրբազանի աճյունը

1968 թ. Ազգային-եկեղեցական ժողովում ընտրվել է Մայր Աթոռի վերստուգիչ հանձնաժողովի անդամ եւ այդ պարտականությունը վարել է մինչեւ 1990 թ. վերջը:

1967-1972 թթ. եղել է Ս. Գեղարդի վանքի վանահայր:

1971 թ. ղեկավարել է Մայր Աթոռ Ս. Օ. Ս. Տ. Վազգեն Ա Ամենայն Հայոց Կաթողիկոսի սրբատառ կոնդակով նշանակվել է Շիրակի թեմի առաջնորդական տեղապահ, իսկ 1973 թ. հոկտեմբերին՝ Շիրակի թեմի առաջնորդ՝ միաժամանակ վարելով Ռուսաստանի եւ Նոր Նախիջեւանի թեմի առաջնորդի պաշտոնը:

1973 թ. ձեռնադրվել է Եպիսկոպոս՝ մինչեւ 1990 թ. շարունակելով



դպրոցը: 1958 թ. ընդունվել է Ս. Էջմիածնի հոգեւոր ճեմարան: 1960 թ. ձեռնադրվել է սարկավագ: 1961 թ. ավարտել է հոգեւոր ճեմարանը:

1961-62 թթ. աստվածաբանության եւ եկեղեցու պատմության վերաբերյալ դասախոսություններ է ունկնդրել եւ վկայագիր ստացել Չագորսկի հոգեւոր ակադեմիայում: 1962 թ. ձեռնադրվել է կուսակրոն քահանա եւ վերանվանվել Նարեկ արքեպ: Մայր Աթոռում վարել է մի շարք պատասխանատու պաշտոններ:

1963 թ., պաշտպանելով «Հայ եկեղեցական իրավունքը մինչեւ Ը դարը» թեզը, ստացել է մասնավոր վարդապետության աստիճան:

պաշտոնավարել իբրեւ Շիրակի թեմի առաջնորդ: 1988-90-ին՝ հետերկրաշարժյան աղետի ծանր օրերին, ղեկավարել է թեմի քաղաքների եւ գյուղերի վերականգնողական անհետաձգելի աշխատանքները, մասնակցել նաեւ կարեւոր վերաշինություններին: 1991-2003-ին ծառայել է Փարիզում եւ արվարձաններում, ապա մինչեւ 2008 թ. վարել է Նիսի եւ շրջակայքի հոգեւոր տեսչությունը:

Հանգստյան կոչվելով՝ Նարեկ սրբազանը վերադարձել է հայրենիք՝ վերջին տարիներին իր օգտակար ծառայությունը բերելով Շիրակի թեմին:

1700 տարի առաջ քրիստոնեության մուտքը Հայաստան հիմնավորելու համար պատմագիտական հետազոտություններում եւ հասարակական քննարկումներում հաճախ արծարծվում են այսպիսի հարցեր՝ արդյո՞ք դա արտաքին հոգեւոր ներթափանցման կամ որեւէ այլ ազդեցիկ գաղափարական ներխուժման հետեւանք չէր, ինչպիսին է այսօր Եհովայի վկաների ազդեցիկան Հայաստանում: Ներկայումս որոշ ներշնչանքներում նկատվող հեթանոսական իմիտացիաների հեղինակները հակված են այդ տեսակետին: Սրա հետ մեկտեղ պատմաբանասիրական նորամուծություններում հմտացած որոշ ուսումնասիրողներ հարում են այն մտայնության,



թե նախաքրիստոնեական շրջանում Հայաստանում տիրապետում էր զրադաշտական կրոնը, որն այստեղ տարածվել էր Կապադովկիայից: Մեր թվարկության III դարի սկզբին Պարսկաստանում հելլենասեր Արշակունիների անկման եւ Սասանյան թագավորների նոր հարստության հաստատման հետեւանքով՝ Կարտիր մոգպետը դարի երկրորդ կեսին Իրանում վերականգնեց Աքեմենյան շրջանում գոյություն ունեցած կրակապաշ-

ՀԱՅԱՍՏԱՆԸ ՔՐԻՍՏՈՆԵՈՒԹՅԱՆ ՀԱՍՏԱՏՄԱՆ ԱՐՇԱԼՈՒՅՍԻՆ

Ջեյմ Ռասսելը հայ ժողովրդի կրակադաշտության մասին

տության զրադաշտական ուսմունքը, որը տարածվել էր նաեւ Կապադովկիայում եղած պարսկական տաճարներում:

Հայոց հեթանոսական հավատալիքները քննության առարկա էին XIX դարի վերջին բարձրագույն կրթություն ստանալու նպատակով Եվրոպա մեկնած

յում)1898 թվին եւ բարձր գնահատվեց հայագետ Հայնրիխ Գեյցերի կողմից:

Հայոց հեթանոսական պաշտամունքը լուրջ քննության առարկա է եղել անցյալ տասնամյակների ընթացքում ամերիկյան հայագիտության մեջ: XX դարի երկրորդ կեսին ԱՄՆ-ում հրատարակված «Հայ ժողովուրդը հնադարից մինչեւ արդի ժամանակը» (*The Armenian People from Ancient to Modern Times. Vol. 2. Ed. by Richard G. Hovannisian. Palgrave Macmillan US, 1997*) երկհատորյակում շրջանագրեց քրիստոնեություն ընդունելուց առաջ հայերի կրակապաշտ լինելու վարկածը: Այդ մասին անգլերեն ուսումնասիրությամբ 1976 թվին հանդես եկավ Նիկա Գարսոյանը (*N.G.Garsoian, «Prolegomena to a study of the Iranian aspects in Arsacid Armenia», Handes Amsoreay, Vienna, 1976, 177-234*): Դրանից մեկ տասնամյակ անց՝ 1987 թվին, պրոֆեսոր Ջեյմս Ռ. Ռասսելը (այժմ Հարվարդի համալսարանի Հայագիտական ամբիոնի ղեկավար) հրատարակեց «Zoroastrianism in Armenia» (*Zoroastrianism in Armenia. By James R. Russell. Harvard Iranian Series. Volume Five. Richard N. Frye Editor. Published by Harvard University. Department of Near Eastern Languages and Civilizations and National Association for Armenian Studies and Research.*

Cambridge, MA. 1987) («Չրադաշտականությունը Հայաստանում») վերնագրով անգլերեն ստվարածավալ (578 էջ) մի ուսումնասիրություն, որն անցյալ չորս տասնամյակում չի արժանացել մեզանում հայ հոգեւոր եւ աշխարհիկ հետազոտողների գեթ



փոքրիշատե ուշադրության, թեեւ բազմաթիվ հայ գիտնականներ եւ եվրոպական լեզուների քաջիմաց հոգեւոր վարդապետներ կարող էին հանձն առնել այդ անհրաժեշտ գործը:

Ջանի որ, վերնագրից բխող հեղինակային շատ խնդրահարույց հանձնառությունից զատ, գրքում քննության են առնված բազմա-

թիվ նոր տեսակետներ եւ աղբյուրներ՝ նվիրված հեթանոսական շրջանի բազմաստվածության, մեհյանների եւ տաճարների պաշտամունքային հարցերին, ինչպես եւ հայ նախաքրիստոնեական աստվածների եւ դիցուհիների փոխառնչությանը՝ արեւմտյան եւ արեւելյան ազգերի հոգեւոր մշակույթի հետ, ուստի շատ ուշագրավ է հեթանոս Հայոց մեջ պաշտված հատկապես Անահիտ դիցուհու պաշտամունքային ավանդությունների եւ նրան բնորոշող մակդիրների համեմատումը համանման իրանական եւ այլ արեւմտյան ու արեւելյան նույնատիպ աստվածությունների (պահլ. Anahita, հուն. Artemis, ինչպես եւ

Nane (Nana), Athena, Hera) հետ, որոնց մասին վերջին տասնամյակներում լույս տեսած ուսումնասիրությունները հարուստ գիտահետազոտական եւ պեղածո նյութեր են հայտնաբերել, իսկ դրանք մեծապես հարստացնում են հեթանոսական շրջանի բազմալեզու հոգեւոր մշակույթը:

Շարունակությունը՝ էջ 4

Ամենայն Հայոց Կաթողիկոսի ցավակցագիրը Իսլամիայի թագավորին


Օգոստոսի 18-ին Ն. Ս. Օ. Տ. Տ. Գարեգին Բ Ծայրագույն Պատրիարք եւ Ամենայն Հայոց Կաթողիկոսը ցավակցական գիր է հղել Իսլամիայի Ֆելիպե 2 թագավորին՝ օգոստոսի 17-ին Բարսեղյանում տեղի ունեցած ահաբեկչության կապակցությամբ:

Ամենայն Հայոց Կաթողիկոսը Հայաստանյայց Առաքելական Ս. Եկեղեցու հավատացյալների եւ հոգեւոր դասի անունից վշտակցություն է հայտնել Իսլամիայի թագավորին, իշխանություններին եւ ժողովրդին:

«Ղառապարտելով Աստծո արարածի կյանքի դեմ այսօրինակ հանցավոր ոտնձգությունը՝ մեր աղոթքն ենք մատուցում Երկնավորին՝ զոհվածների հոգիների խաղաղության ու հանգստության եւ տուժածների շուտափույթ ապաքինման համար:

Մեր գորակցությունը հայտնելով Ձեզ եւ Իսլամիայի բարեկամ մեր ժողովրդին՝ ի սրտե մաղթում ենք Բարձրյալն Աստծո հովանին եւ օրհնությունը՝ հաղթահարելու այս չարիքը եւ վերականգնելու Իսլամիայի խաղաղ ու բնականոն կյանքը»,- ասված է Նորին Սրբության ցավակցագրում:

Մայր Աթոռ Ս. Էջմիածինը հյուրընկալեց ռազմաուսումնական հաստատությունների շրջանավարտներին



Սկիզբը՝ էջ 2

Սիրելիներ, ձեզ գորացնողը Տեր Հիսուս Քրիստոս է՝ Չորագլուխը Սուրբ Եկեղեցու, եւ ձեր ապավենը՝ հարուցյալ ու հաղթական, Տիրոջ հավատարիմ հոտը՝ մեր ժողովուրդը: Ամեն ինչի կարող կլինեք դուք, եթե ունենաք անսասան վստահություն առ Փրկիչ Տերը եւ սերը՝ առ մեր ժողովուրդը, որոնք ձեր մարտական ծառայությունների մեջ ու ղվարությունների առջեւ ձեզ օգնական ու զորակից են լինելու: Շուտով ամենքդ պիտի կոչվեք մարտական ծառայության՝ մեծ պատասխանատվություն ստանձնելով մեր երկրի ու ժողովրդի առջեւ: Ձեր ամեն մի որոշումից ու ձեր գործերից է կախված լինելու Հայրենիքի ապահովությունը, Հայրենիք, որ սուրբ է ու նվիրական իր հազարամյակների

անցյալով, հաղթական ներկայով ու առավել պայծառ ապագայով, որը մեր հանձնառություններով պիտի կերտենք մենք: Մաղթում ենք ձեզ խաղաղ ու անվտանգ ծառայություն՝ հանուն մեր երկրի զորացման ու հավատավոր մեր ժողովրդի բարգավաճման: Մաղթում ենք արթուն միտք ու հոգի, որ Աստծո օգնականությամբ նախանձախնդիր ձեր ծառայությամբ առավել հզորություն բերեք Հայոց բանակին, ապահովություն՝ մեր սահմաններին: Չորացեք Հիսուս Քրիստոսով, աղոթեք հայրենիքում խաղաղության հաստատման հույսով եւ ապրեք ձեր հավատի ու հայրենիքի ազատությունը պաշտպանելու անկոտրում հաստատակամությամբ: Թող Տիրոջ ամենազոր Աջն ու զորությունը հովանի լինեն ձեզ ամենքիդ՝

Հայոց փառապանծ բանակում ձեր գալիք ծառայությանը ընթացքին: Գիտցե՛ք՝ մեր բոլոր հաղթանակների ու ազգային կյանքի ձեռքբերումների անսպառ աղբյուրը մեր ժողովրդի հոգու անպարտելիությունն է, որն Աստծով զորացած՝ կարողացավ իր պատմության բոլոր փորձությունները հաղթահարել, ցեղասպանությունը վերապրել, հոգեւոր ու մշակութային համաշխարհային մակարդակի ժառանգություն կերտել եւ թշնամական երկրներով շրջապատված լինելով՝ ազգային ինքնությունը անաղարտ պահպանել ու հայրենիք կերտել ու զորացնել:

Գոհունակ սրտով հայրապետական Մեր օրհնությունն ու բարեմաղթանքներն ենք բերում Հայաստանի Հանրապետության ռազմա-

կան ղեկավարությանը՝ գլխավորությամբ Հայաստանի Հանրապետության Նախագահ տիար Սերժ Սարգսյանի եւ Հայաստանի Հանրապետության պաշտպանության նախարար տիար Վիգեն Սարգսյանի: Մեծապես գնահատելի է, որ մեր պետությունը ջանք ու կարողություն է ներդնում՝ Հայոց բանակը գիտելիքներով եւ հոգեւոր ու բարոյական բարձր արժեքներ կրող զինվորականներով համալրելու գործում:

Թող բարին Աստված խաղաղության մեջ պահպանի Հայրենի մեր երկիրը, հզոր ու անկուն՝ Հայոց հաղթական բանակը եւ միշտ աջակից լինի աշխարհասփյուռ մեր ժողովրդին՝ ազգային իրավունքների խաղաղության մեջ այսօր եւ հավիտյանս:

Արարողության ավարտին Գեւորգյան հոգեւոր ճեմարանի հանդիսությունների դահլիճում տեղի ունեցավ ընդունելություն, ապա զինվորականներն այցելեցին Մայր Աթոռի թանգարաններ, ծանոթացան Հայոց Եկեղեցու սրբություններին եւ ցուցադրվող հոգեւոր-մշակութային սրբազան ժառանգությունը:

ՄԱՅՐ ԱԹՈՐ ՍՈՒՐԲ ԷՋՄԻԱՇԻՆԻ ՏԵՆԵԿԱՑԱԿԱՆ ՀԱՄԱԿԱՐԳ

Ե. ՉԱՐԵՆՑԻ ՉԵՌԱԳՐԵՐԻ ԵՎ ՀԱՐԱԿԻՑ ԽՆԴԻՐՆԵՐԻ ՄԱՍԻՆ

Նվիրվում է Ե. Չարենցի ծննդյան 120-ամյակին

Սկիզբը՝ թիվ 14-15

Չարենցյան ձեռագրերը նա հավաքել էր և նաեւ ուրիշներից, որոնց մասին նրան տեղեկացրել է Իգարբելայի մայրը: Այդպիսիներից մեկը եղել է Ամսթերդամում հիշյալ տիկինը, ով իր հերթին կապված էր Ռեզինայի հետ:

Հովհաննիսյանը շարունակում է. «Տարբեր ճանապարհներով ձեռք բերած՝ քանակով 16 000 անտիպ տող ձեռագիր ժառանգություն համապատասխան գրանցումով ամբողջովին հանձնել էր թանգարան: Թանգարան եմ հանձնել նաեւ Չարենցի լուսանկարներ եւ հեղինակի մակագրությամբ պոեմների առանձին հրատարակություններ»:

Այնուհետեւ նա տեղեկացնում է, որ 1945 թ. իր ձեռքին է եղել «Թուղթ Իսսիֆ Ստալինին» ուղերձի մեքենագիր օրինակը եւ ռուսերեն գրած ինքնագիրը նամակը (որի սկիզբը չէր գտնվել): Այդ 74 էջանոց նամակը ներկայացրել է Կենտրոն՝ Սահակ Կարապետյանին, ուր եւ հետքերը կորել են: «Չեռագրյալ տեղեկացա, որ անվտանգության մարմիններում աշխատող մի սպա (Ռ. Ակոպով) նրան հանձնել է նաեւ Չարենցի ինքնագիր մի բանաստեղծություն, որի հետքերը նույնպես չկան», - շարունակում է նա:

Այնուհետեւ Հովհաննիսյանը նշում է, որ «իր տրամադրության տակ» եղել են ինքնագրեր. «Իմ ներկայացրած բազմաթիվ անտիպ երկերից 1946-ին լույս տեսած «Ընտիր էջեր»-ում տեղ գտավ միայն «Թուղթ»-ի նախերգը»:

Հովհաննիսյանը նաեւ նշում է, որ Աննա Կողբաշյանի խնդրանքով ինքը նրանց տան համար հայթայթել է վառելափայտ, մթերք, իսկ այդ ծառայության վարձատրությունը եղել է Չարենցի ժառանգության մնացած մասը: Նա շարունակում է. «Մեր մտավորականությունից մոտ քսանհինգ հոգի <...> փոքր խմբերով, ծպտյալ կարգով ինձ մոտ էին գալիս՝ <...> Չարենցի ձե-

ռագրերը կարդալու»: Հետո նա ավելացնում է, որ դրանք հանձնել է ԳԱԹ-ին:

Այնուհետեւ նա խոսում է բանտում Չարենցի գրած բանաստեղծությունների մասին: Պատերի գրված գործերով լի մի տետրակ պահպանել եւ բանտարկությունից հետո իր հետ տուն է տարել ՀԼԿԵՄ Կենտրոնի նախկին քարտուղար Միքայել Գեորգյանը (նույն տեղը, էջ 389-405):

Ավելացնելը, որ Հովհաննիսյանը, իր իսկ վկայությամբ, Չարենցին ճանաչել է 1933-ից, երբ Պետհրատում աշխատել է որպես ՀԼԿԵՄ Կենտրոնի ներկայացուցիչ, ինչը նույն է, թե կուսակցության գործակալ:

Այն ամենը, ինչ Ռ. Ղազարյանը եւ Ե. Հովհաննիսյանը հանձնել են ԳԱԹ, ուսումնասիրվել է եւ հրապարակվել (տե՛ս Անտիպ եւ չհավաքված երկեր, Ե., ԳԱ հրատարակչություն, 1983, կազմող՝ Ա. Չարենց, Նորահայտ էջեր, Ե., Երեւանի համալսարանի հրատարակչություն, 1996, կազմող՝ Ռ. Գասպարյան):

Պատմում է Ռուբեն Չարյանը: Չարենցի ձեռագրերի երրորդ խմբաքանակը հայտնվել է Գ. Եմինի տանը:

Հայտնի է, որ 1936-1937 թթ. Եմինը մոտ-մոտ է արել Չարենցին: Վիգեն Խեչումյանի, Սուրեն Թարյանի հետ՝ որպես երիտասարդ գրողներ, այցելել են տանը մեկուսացած Չարենցին: Այդ մասին Եմինը գրել է իր հուշերում: 1989 թ. իր ծավալուն հուշերը Եմինը տրամադրեց ինձ՝ տպագրելու հիշողությունների՝ Նախատեսվող հերթական գրքում, ինչը եւս արել եմ 2008 թ. հրատարակության մեջ (որովհետեւ 1997-ին «Նաիրի» հրատարակչության կողմից Եմինի նյութը գրքից հանվեց):

Թե՛ Եմինի, թե՛ Ռ. Ղազարյանի հուշերից եւ թե՛ այլ աղբյուրներից (Արփենիկ Չարենց, Հեղինե Մուրադյան՝ Եմինի հարազատ քույրը, Ռուբեն Չարյան) հայտնի էր, որ Եմինի ձեռքն են ընկել չարենցյան ձեռագրեր: Այդ մասին

գրական միջավայրում խոսվում էր: Այդ մասին գիտեինք:

Հայտնի է, որ Հայպետհրատում աշխատած տարիներին Չարենցը մտադիր էր հրատարակել Տերյանի երկերի ժողովածուն՝ ներառյալ նաեւ անտիպները: Այդ նպատակով Խանջյանի թույլտվությամբ ԳԱԹ-ից իր տուն էր տարել Տերյանի ինքնագրերը, հիացել դրանցով, իր օրագրի մեջ գրառումներ արել (14.03.1934), հաճույքով արտագրել եւ ձեռագրերը վերադարձրել թանգարան: Չարենցի նախատեսած Տերյանի հատորը 1940 թ. հրատարակեց Ռ. Չարյանը: Գ. Եմինը Ռ. Չարյանին է տրամադրել Չարենցի արտագրածները, ինչն էլ վերջինս տպագրել է նշված հատորում:

Այս կապակցությամբ Ռ. Չարյանը գրում է. «Գեորգ Եմինը, լսելով, որ կազմում եմ Տերյանի ժողովածուն, մի գեղեցիկ օր իմ գրասեղանին դրեց թղթերի մի փոքրիկ կապոց: Բացեցի եւ, ո՛վ գարմանք, տեսնեմ Տերյանի՝ Չարենցի ձեռքով արտագրված անտիպ բանաստեղծություններն են: Հուսով եմ, որ Գեորգ Եմինը օրերից մի օր կգրի, թե որտեղից եւ ինչպես էին իր ձեռքն անցել այդ էջերը» («Սովետական Հայաստան», 1987, 3 հունիս, նաեւ՝ «Չարենցի հետ: Հուշեր», 2-րդ մաս, 2008, էջ 131-139: Հարցի մանրամասն ընկալումը տե՛ս Ռ. Գասպարյան, «Հայ գրականություն», գիրք 2, 2002, էջ 88-92):

Շարունակության մեջ Ռ. Չարյանը նշում է, որ խոսքը 40 բանաստեղծության մասին է եւ ամփոփում. «Ահա այդ քառասուն բանաստեղծության համար մենք պարտական ենք Գեորգ Եմինին: Չարենցի ձեռագրերը պահվում են իմ թղթերում եւ արխիվային այլ նյութերի հետ շուտով կդառնան Գրականության եւ արվեստի թանգարանի սեփականությունը»:

Եմինը լռեց եւ ոչինչ չասաց, որովհետեւ շղթան կբացվեր:

Միջանկյալ մտաբերեց, որ Ռ. Չարյանը 1940-ական թթ. բանաստեղծ Եմինին եռանդով



պաշտպանում էր քննադատական հարձակումներից: Այսինքն՝ նրանք գրական դաշինքի մեջ էին... նաեւ Չարենցի արտագրած Տերյանի ձեռագրերի հաշվին:

Եմինի քույրը՝ շատ հարգելի Հեղինե Մուրադյանը, կյանքի վերջին տարիներին ինձ հաճախակի էր հրավիրում Գրողների միության դիմաց գտնվող իր տուն՝ գրական գրույցների: Այդ ընթացքում էլ հայտնեց, որ Եմինն ունի չարենցյան ձեռագրեր: Նաեւ ասաց, որ Ռեզինա Ղազարյանի ունեցածը (այն մասը, որ տվել էր Արփենիկ) բերում էին իր տուն, եւ Չարենցի ինքնագրերը ինքը, Եմինը, Արփենիկը կարդում էին եւ արտագրում: Այս ձեռագրերի խմբաքանակից եւս Եմինը որոշ բաներ տարել է իր տուն: Այդ մասին Ռ. Ղազարյանը մի քանի անգամ ակնարկել է մեր հանդիպումների ժամանակ:

Հ. Մուրադյանն իր արտագրածներից պահպանել էր Չարենցի «Աղասի Խանջյանին» հույժ կարեւոր գրառումը, ինչը նա տրամադրեց ինձ, եւ էլ տպագրեցի «Նորահայտ էջեր»-ի մեջ: Հ. Մուրադյանը պահպանել էր նաեւ Չարենցի առանձին ինքնագրեր, բանաստեղծության (կամ պոեմի) տներ՝ քառասույսի փոքր թղթերի վրա (մոտավորապես 10 սմ x 10 սմ չափի):

1995 թ. «Գարուն» ամսագրում (թիվ 5) Եմինը հրապարակեց «Դժբնիքը Նաիրական» շարքի տոնետների նոր տարբերակներ, որոնք չկային «Անտիպ եւ չհավաքված երկեր» գրքում: Այնպես պատահեց, որ հենց «Գարունի» խմ-

բագրատան էլ հանդիպեցինք: Իմ հարցումին, թե որտեղ են պահվում ինքնագրերը (քանի որ սկզբնաղբյուրը չէր նշել), նա անորոշ ինչ-որ պատասխան տվեց, թե Չարենցի աներոջից՝ Ավետիս Կողբաշյանից ինքն ու Վիգեն Խեչումյանը վերցնում, արտագրում եւ վերադարձնում էին: Չհավատացի այդ հորինվածքին, ինչի մասին մանրամասնորեն գրել եմ «Նորահայտ էջեր» գրքի ծանոթագրությունների բաժնում (տե՛ս էջ 438):

Երբ 1980-1990-ական թթ. հրապարակում էի տարբեր պահոցներից հայթայթած՝ Չարենցի ժառանգության առաձին էջեր, մեկ-երկու բանաստեղծության կապակցությամբ Եմինն ինձ հայտնեց իր տարակարծությունները, ինչը եւս իր հերթին վկայություն է, որ նա տեղյակ էր այլ տարբերակների, գուցե մաքրագիր վերջնական օրինակների մասին:

Ահա այսքանից հետո վերադառնալով բուն դիպաշարին:

Պատմում է Գեորգ Եմինը: Չարենցին ձեռքակալելու, ընտանիքը տեղից վտարելու ժամանակ հարկ է եղել այլ իրերի հետ մեկտեղ տեղափոխել նաեւ Չարենցի ձեռագրերն ու գրադարանը: Սա՝ այն ժամանակ, երբ Չարենցի կինը դեռեւս ձեռքակալված չէր: Ահա այս ընթացքում շատ եռանդուն գործունեություն է ծավալել Եմինը: Օգնել է տեղափոխման գործին եւ այս միջոցում էլ Չարենցի թղթապանակների պարունակությունը փոխադրել իր տուն:

Շարունակությունը՝ էջ 6

ՂԱՅԱՍԱՆԸ ՔՐԻՍՏՈՆԵՌՈՒԹՅԱՆ ՂԱՍՏԱՏՄԱՆ ԱՐՇԱԼՈՒՅՄԻՆ



ների (Ագաթանգեղոս, Եզնիկ, Եղիշե, Փարպեցի, Սեբեոս եւ այլն) պատմական երկերում տեղ գտած բանավիճական արձագանքների եւ դրանցից քաղված

առանձին արտահայտությունների եւ եզրույթների մեկնաբանման վրա: Հակառակ հայ հին հեղինակների ընդդիմախոսության՝ պրոֆ. Ռասսելը նրանց եզրակա-

ցությունները եւ մեկնողաբար օգտագործած գրադաշտական տերմինները հիմք է դարձրել իր համար՝ առաջ բերելու եւ հիմնավորելու համատարած կրակապաշտության գաղափարը նախաքրիստոնեական հեթանոսական Հայաստանում:

Այդ ուսմունքի հիմնադիր Չրադաշտ մոգի մասին մեր հին մատենագրության մեջ որոշ պատկերացում է տալիս Նախ եւ առաջ Մովսես Խորենացին՝ օգտվելով, իր խոսքով ասած, իրեն շատ սիրելի եւ շատերից ավելի արդարախոս Բերոսյան Սիբիլայից: Չրադաշտ մոգը բակտրիացիների կամ մեդացիների թագավորն էր, որին Շամիրամը կուսակալ էր Ասորեստանի ու Նինվեի վերակացու էր թողնում, երբ ամառները գալիս էր Հայաստանում շինած իր ամառանոցը (Մովսիսի Խորենացույ Պատմութիւն Հայոց,

Տիգրիս, 1913, գիրք Ա. 2, էջ 23): Իսկ երբ Չրադաշտը տիկնոջ դեմ մի սխալանք գործեց, գշտության պատճառով Շամիրամը նրա դեմ պատերազմ սկսեց, քանզի մարդ (իմա՝ Չրադաշտը) մտադիր էր բռնանալ ամենքի վրա. Շամիրամը փախավ Հայաստան եւ այստեղ սպանվեց իր կրտսեր որդու՝ Նինվասի ձեռքով (Խոր., Ա. 2, էջ 23, Ա. ԺԷ, 55, 56): Շամիրամի եւ Չրադաշտ մոգի ժամանակակցությունը կարող է հարուցել ընթերցողի տարակուսանքը, սակայն հարկ է նշել, որ զանազան գրույցները հաշվի առնելով՝ մասնագետները եկել են այն կարծիքի, որ ուսմունքի հիմնադիր Չրադաշտ մոգը (Ավետայումա՝ Չրաթուշտրա, միջին պարս.՝ Չարդուշտ, հուն.՝ Zoroaster, իսկ անձնանունը՝ Սպիտամա) ապրել է գործել է մ. թ. ա. 1000-ից 500 թվերի միջակայքում (Meyers Neues Lexikon in acht Bänden. Band 8, Leipzig, 1964, S. 846):

Շարունակելի

Ալբերտ ՄՈՒՇԵՂՅԱՆ

Բանասիրական գիտ. դոկտոր

Սկիզբը՝ էջ 3

Անհրաժեշտ եմ համարում նշել, որ ներկա ուսումնասիրության մեջ հեղինակ պրոֆ. Ռասսելը դրսևորել է հայ հին մատենագիրների եւ նրանց պատմամշակութային ժառանգության նկատմամբ անհամեմատ ավելի նրբանկատ եւ հարգալից վերաբերմունք, քան մինչ այդ դրսևորվել է ամենից առաջ ԱՄՆ-ում հրատարակված եւ շատ քննադատված «Հայ ժողովուրդը հնադարից մինչեւ արդի ժամանակը» երկհատորյակում:

Ասվածի հետ միասին ես խիստ վերապահումով եմ անդրադառնալու պրոֆ. Ջեյմս Ռասսելի որդեգրած հայ ժողովրդի նախաքրիստոնեական կրակապաշտության կոնցեպտին, որը հաստատելու համար նա հենվում է ինչպես Չորոաստրիզմին եւ դրան հարող պաշտամունքներին նվիրված օտարալեզու բազմաթիվ հետազոտությունների, այնպես էլ մագդեգական կրոնի եւ գրադաշտական ուսմունքի վերաբերյալ V-VII դարերի հայ հին հեղինակ-

5

Սկիզբը՝ թիվ 12-15

Քաղաքի ու երկիր Նաիրիի անկման գլխավոր պատճառներից մեկը 1917 թ. ամբողջ Ռուսաստանով մեկ տարածված փետրվարյան հեղափոխությունն էր, որի պետականակործան ալիքն արդեն մարտի 2-ին հասել էր Կարս, որը թեև հայկական, բայց Ռուսաստանի ենթակայության քաղաք էր՝ իր «գլխավոր Սոխ» գավառապետով, բանակի հրամանատարական ու սպայական օտարախոս կազմով, զինվորական փողային երաժշտախմբով ու բոլորի կողմից անվերջ հոլովվող «Боже царя храни» երգով, թեև քաղաքի իրական պաշտպանները կանադական զինատեսակներին դեռևս անվարժ տրեխավոր հայ գյուղացիներն էին, որովհետև Կարսի հարուստ երեւելիները, բոլշևիկյան քարոզչության հետեւանքով, երկրի ու քաղաքի պաշտպանությունն իրենց գործը չհամարելով՝ իրենց զավակներով հեռացել էին քաղաքից:

Իսկ բուն զոհը... Յեղափոխականորեն տրամադրված ցարական բանակն այլևս կռվելու ցանկություն չուներ, այլ բոլշևիկյան հրահանգավորումով հենց իր պետական իշխանության դեմ էր պայքարում: Քաղաքում ստեղծվել էր անհասկանալի մեծ խառնաշփոթ, որից գլուխ չէին հանում շատերը: Յեղափոխական այդ օրերին հատուկ հանձնարարությամբ Կարսում հայտնվում է բոլշևիկ Կարո Դարայանը եւ իջեւանում իր ազգական այլ մարդիկ: Գրաստամատյանի տանը: Յենց այդ օրերին էլ բերդից դուրս են գալիս «գորբեր, գորբեր, գորբեր, գնդացի ու թնդանոթ», բայց ոչ թե Յավիտենական Յիվանդի կամ դարավոր ոսոխի դեմ կռվելու, այլ սեփական իշխանությունների, պետական կառույցների, գավառապետի ու ոստիկանապետի դեմ էր «ուռաճաճաճ» կանչելով գրոհում ապստամբած գործը: «- Յո՛ւ, բան մը կհասկնա՞ք սա դաւաբաւդըն», - հարցրեց Յաջի Օնիկ Էֆենդին սրճարան մտնելով. «- Ընչի՞ չենք հասկնա օր», - կտրուկ պատասխանեց Տելեֆոն Սեթոն. «- գորբին պրիկազ է եկե օր ռեւոլյուց ենեն», - վերջացրեց Տելեֆոն Սեթոն, ու տիրեց լուրջութիւն» (5, 202):

ԻՆՔՆԱԿԵՐՈՎԱԿՈՐՎԱԾ ՉԱՐԵՆՑԸ «ԵՐԿԻՐ ՆԱԻՐԻ» ՎԵՊՈՒՄ ԵՎ ԿԱՐՍԻ ԱՆԿՈՒՄԸ ՆՐԱ ՆԱՅԱՑՔՈՎ Նվիրվում է Ե. Չարենցի ծննդյան 120-ամյակին

Իսկ «ռեւոլյուց ենողներին» կազմակերպում էին բոլշևիկ Կարո Դարայանն ու պ. Մարուքե Գրաստամատյանը եւ խիստ կասկածելի օրիորդ Սաթոն: Յենց նրանք են բնակիչների շրջանում խուճապ առաջ բերել, զինվորներին զրգռել հրամանատարության դեմ, նվաստացնելով ու անարգելով պոկել գլխավոր Սոխի՝ գավառապետի ուսադիր-«չինները»: Այս իրողությունների գեղարվեստական պատկերն են վեպի առաջին մասերը, որոնք ներառում են նաեւ մանր առեւտրականների, արհեստավորների, խաղաղ առօրյայով ապրող, իրենց ապագայի հանդեպ անհոգ նաիրցիների, ասենք, գիշերները իր պատրաստած դագաղների մեջ քնող Մեռելի Ենոքի, «վակ-գալի մեյդանում չայ ու կալբաս ծախող» Զոռ Արուֆի, եղեռնից մազապուրծ մշեցի գաղթական Թաթոյի եւ Կարսում ապաստանած մյուս գաղթականների նկատմամբ հեղինակային վերաբերմունքը: Իհարկէ, միանգամայն այլ է գավառապետի կամ «գլխավոր սոխի», բոլշևիկների՝ «քամի թոցնող» կամ «քամի կուլ տվող» Կարո Դարայանի, պ. Մարուքե Գրաստամատյանի, գանազան բամբասաքներ տարածող «պսակի չարժանացած», ծամը կտրած օրիորդ Սաթոյի (որին խառնակչական գործունեության համար նաեւ «դարմանի տակի ջուր» էին անվանում, վարսավիր Վասիլի եւ մյուսների հանդեպ:

Ազնիվ օրագրողի պես Չարենցը գրել է, որ ինքը մեկ տարի բացակայել է քաղաքից. իսկ սա նշանակում է, թե Չարենցը գերազանցապես ներկայացրել է անձամբ իր տեսածը եւ միայն այդ մեկ տարվա իրադարձություններն է պատկերել ուրիշներից լսածների կամ սեփական ուսումնասիրությունների հիման վրա: Իսկ այդ «մեկ տարին» մոտավորապես համապատասխանում է 1917-1918 թթ., երբ բանաստեղծը մեկնել էր Ռուսաստան եւ հոկտեմբերյան ու քաղաքացիական կռիվներից ստացած ներշնչումով գրել իր հեղափոխական պոեմները: Բայց այդ ժամանակամիջոցում Յայաստան-Նաիրիում էլ եղել են լավ կամ վատ, կարելի է ասել՝ ճակատագրական իրադարձություններ: 1918 թ. մայիսյան դեպքերն ավարտվեցին թուրք նվաճողների դեմ Սարդարապատի, Ապարանի եւ Դարաքիլիսայի ճակատամարտերում հայերի պատմական հաղթանակով եւ Յայաստանի Առաջին Հանրապետության ստեղծումով: Վերջին իրադարձությունն ինչպե՞ս է ընդունել Չարենցը: Կարծես նրա համակրելի հերոսը՝ Մազուրի Յամոն է խոսում հեղինակի անունից, բայց սա հենց Չարենցի խոսքն է. «Շատ ջրեր էին հոսել Նաիրյան




այդ քաղաքի եւ ընդհանրապես Նաիրիի ու աշխարհի վրայով այդ մի տարվա ընթացքում, երբ են բացակայում էի քաղաքից ու Նաիրիից, եւ ամենանշանավորն ու կարեւորն այն էր, որ այդ ջրերի հետ մեկտեղ **հոսել էին նաեւ բանակները Նաիրիից** ու այդ **քաղաքից**, եւ Նաիրին ու այդ քաղաքը մնացել էին Մազուրի Յամոյին ու Նաիրցիներին, երազյալը կարծես երկրային էր դարձել, Մազուրի Յամոյի ուղեղից սահելով՝ մարմնավորվել էր կարծես երկիրը Նաիրի: Հավաքել էր «**Ընկերությունը**» եւ **գրավված վայրերն** էր ուղարկել բազում ու անհամար **Նաիրյան ռազմիկներ**, դարերի մուծից, մշուշից ելնելով՝ հառնել էր, վերջապես, **Նաիրյան կարծր ոգին**, գրավել էր շենքեր ու քաղաքներ. բռնել էր **Բերդը**: Անթիվ տարիներից, դարերից հետո վերստին Նաիրյան դարձած **Առաքելոց եկեղեցում** Նաիրյան հնամյա բարբառով աստվածահաճո պատարագ էր անում արդեն **տեր Հուսիկ քահանան** -

Խաչագողը, ու բերդի ամենաբարձր աշտարակի վրա եռագույն դրոշ պարգած՝ **Բերդի** հրամանատարն էր **Ընկ. Վառոդյանը**» (5, 231, ընդգծ. Ե. Չարենցի): Այս ամենին պետք է գումարել նաեւ պետականության մյուս կարեւոր խորհրդանիշը՝ այն, որ «Боже царя храни»-ի փոխարեն արդեն հնչում էր Նաիրյան հիմնը՝ «Մեր հայրենիքը», ստեղծվել էր հայրենի կառավարություն, վերակառուցվել՝ կրթահամակարգը, եւ Արամ Անտոնիչն էլ դարձել էր ազգային դպրոցների տեսուչ: Ցնծության մեջ էր ժողովուրդը. վերջապես դարերի հպատակությունից հետո վերականգնվել էր Նաիրցիների երազած ինքնիշխան պետականությունը:

Ապագայի հանդեպ թերահավատների եւ ընդդեմ երկիր Նաիրիի գործիչների նկատմամբ Չարենցը դրսևորել է խստագույն արհամարհանք, կծու հեգնանք, որ երբեմն էլ վերածվել է բուռն գայրույթի:

Շարունակությունը՝ էջ 7



Սկիզբը՝ թիվ 15
Եվ ահա Սիմեոն կաթողիկոսը որոշում է Էջմիածնում կառուցել նաեւ թղթի գործարան: Նա Եվրոպայից հրավիրում է թղթաշինության գործում հմուտ արհեստավորների, ովքեր տաճարի հարավային կողմում, որտեղ առաջ պարտեզ էր՝ «խաղավարտ սեղ-խենիք սերմելու համար», կանգնեցնում են թղթի գործարանի շենքը՝ մի եկեղեցու չափ, տաշած քարերով եւ կրով, 20 գազ երկարությամբ, 9 գազ լայնությամբ: Այդ մասին Չարեհանայանը գրում է. «...Եւրոպայէ հմուտ արհեստագետներ բերել տալով, 1774-ին տաճարին հարաւային

կողմը ու անկէ բաւական հեռու՝ մեծ շէնք մը կառուցանելով, հոն գետեղեց թղթաշինութեան համար բերել տուած գործիքները»: Թղթարտադրության համար անհրաժեշտ երկու կարետր պայմանները՝ բամբակի ու ջրի (որոնցով օժտված էր Արարատյան դաշտավայրը) առատությունը, մեծ հաջողություն էին խոստանում: Թղթագործարանը եւս կառուցվում է մադրասցի բարերար Գրիգոր Խոջաջանյանի ծախսերով: Այդ ժամանակ Պարսկաստանում կային թղթի գործարաններ, սկզբում Սիմեոնն այնտեղից է վարպետներ բերել տալիս, բայց նրանք չեն կարողանում գործը

ԷԶՄԻԱԾՈՒ ՏՊԱՐԱՆԸ ՈՒ ԹՂԹԻ ԳՈՐԾԱՐԱՆԸ

գլուխ բերել: Տեսնելով, որ գործը շատ է ուշանում, Սիմեոն կաթողիկոսը խնդրում է Գրիգոր Խոջաջանյանին, որ վերջինս ինքը վարպետներ գտնի՝ գործարանը սարքի գցելու եւ թուղթ արտադրելու համար: Գրիգորը պայմանագիր է կնքում Փարիզից Կ. Պոլիս եկած երկու վարպետների՝ Բեյսոնի (Բիսիոն) եւ Դեսիոռի հետ. նրանք պարտավորվում են 2 տարվա ընթացքում ամբողջովին ոտքի կանգնեցնել տպարանը, ինչպես նաեւ՝ իրենց արվեստը սովորեցնել աշակերտների, ովքեր իրենց ժամկետը լրանալուց հետո կշարունակեին թղթի արտադրության գործը: Բացի ուտելիքից եւ ընծաներից՝ Գրիգոր աղան խոստանում է 14.000 ռուբլի վարձ եւ նրանց հետ դնում մի լեզվագետ-թարգմանչի՝ Աղթամարի կաթոլիկ համայնքից:

Սակայն վարպետները գործի հենց սկզբից սկսում են դժվարություններ հարուցել՝ կամենալով առանց գործը կատարելու վերցնել դրամը եւ փախչել: Մեծ վարպետը շուտով պահանջ է դնում արձակելու փոքր վարպետին, որ-

պեսզի ինքը կարողանա գործից գլուխ հանել եւ լավ թուղթ տալ: Հայոց հայրապետը համաձայնում է, արձակում է փոքրին եւ վերադարձնում Կ. Պոլիս: Դրանից հետո մեծ վարպետը նոր պահանջ է դնում, այն է՝ 6 տարվա պայման կապել եւ վարձը տալ՝ գործը վերջացնելու համար: Բայց կաթողիկոսը պահանջում է դեռևս իր շնորհը ցույց տալ: Այդպես 2 տարի ապարդյուն ձգձգվում է գործը. Բամբակաձորի անտառներից հսկայական գերաններ են բերել տալիս գործիքների համար, այդ գերանները սղոցելու համար էլ հեռավոր վայրերից հատուկ վարպետներ են կանչում: Այսպես լրանում է 2 տարին, բայց գործն առաջ չի գնում: Սիմեոնը զայրացած իր մոտ է կանչում վարպետներին եւ պահանջում խոստացած աշխատանքը: Վարպետները ստիպված են լինում խոստովանել, որ ուխտել են իրենց իմացած արհեստը ոչ ոքի չսովորեցնել: Բայց երբ Սիմեոնը սպառնում է սառցատուն նետել նրանց, վերջիններս զղջում են եւ 6 ամիս ժամանակ խնդրում ի-

րենց հանձն առած գործն ավարտելու համար: Կաթողիկոսը տալիս է նրանց խնդրած 6 ամիսը եւ իր կողմից թղթի գործարանի վերատեսուչ նշանակում Իսահակ արք. Գեղամյանին, ում հսկողությամբ շուտով գործարանը ոտքի է կանգնում 1776 թ.:

Նոր արտադրված թղթով կաթողիկոսը շտապում է տպել իր «Գիրք որ կոչի Պարտավճար» աշխատությունը, որի տպած օրինակը ուղարկելով Գրիգոր աղային՝ միաժամանակ հայտնում է նրան, որ գործարանի վրա հավելյալ ծախսվել է 7800 պարսկական թուման: Գրիգորը, ստանալով իր նվիրաբերության առաջին պտուղը, իսկույն ուղարկում է ծախսված գումարը եւ, ի նշան շնորհակալության, հայոց հայրապետին ուղարկում 400 գույգ ընտիր հախճապակե ըմպանակ ու այլ ամանեղեն, որոնց վրա հայերեն ոսկեգրված էր՝ «Ի վայելումն Տեառն Սիմեոնի սրբազան կաթողիկոսին ամենայն Հայոց: Ի ՌՄԻՁ. (1777) թուին»:

Շարունակությունը՝ էջ 7



Սկիզբը՝ թիվ 14-15

Գրիգոր Մարաշեցին 1149-ին շատ ծանր է տարել թուրք բարբարոսների ներկայութիւնը, դաժանութիւնները, եւ այդ դժնի օրերին ողբերգական տարրերը, վայերն ու ողբերը բնականաբար մեծ տեղ են գրաւել նրա ստեղծագործութեան մէջ: Բոլորովին ուրիշ տրամադրութեան ու բնոյթի գործեր է գրել նա յարաբերաբար խաղաղ պահերին: Ամենայն հաւանութեամբ այդ կարգի գործերը, որ ստեղծուած են հանդարտ ու հանգիստ սրտով, երբեմն ներշնչանքով, նախորդել են Վայգրքին, յամենայն դէպս աւելի տանելի ժամանակների արգասիք են: Երբ նրա միտքը դեգերել է ուրիշ մի աշխարհում, ուրիշ հետաքրքրութիւններով է առաջնորդուել, գրել է մասնաւորա-

ՄԱՐԻԱՄ ԱՍՏՈՒԱԾԱԾՆԻ ՎԵՐԱՓՈԽՄԱՆ ՏՕՆԸ ԺՈՂՈՎՐԴԱԿԱՆ ԿԵԱՆՔՈՒՄ

բար Աստուածածնին նուիրուած գործեր: Սրանց պսակը, ինչպէս նշեցինք, Վերափոխմանը նուիրուած «Բան գովեստից» երկն է, որով եւ հայ մատենագրութեան մէջ Գրիգոր Մարաշեցին բացել է նոր մի ճանապարհ, դրամատիկ ձեւի կիրառումով:

Օգտուելով Նոր Կտակարանից, առաւելապէս Դուկասի Աւետարանից, հեղինակը շատ սեղմ, ծայրաստիճան հակիրճ ընդհանրացումով ներկայացնում է Աստուածամօր Վերափոխումը: «Ծնունդը, սնունդն ու քաղաքավարութիւնը» թեպէտ նշուած է խորագրում, բայց երկը կառուցում է՝ առանցք ունենալով միայն Վերափոխումը, որ գլխաւորն է եւ եզակի երէւոյթ՝ մահկանացու մարդու ճակատագրի առումով, անդրադարձ է կատարում Աստուածածնի պատկերի աւանդութեանը՝ գերծ մնալով շատ մանրամասնութիւններից (Մանրամասնութիւններն ըստ Էուրթեան հետաքրքրական են եւ, անշուշտ, Մարաշեցին գիտակցաբար անտեսել է դրանք՝ համարելով, որ, այնուամենայնիւ, անհարկի կծանրացնեն իր խօսքը: Այդպիսի մանրամասներ կան եւ Յայսմաւուրքի, եւ պարականոն բնագրի մէջ): Այդ հակիրճ կենսապատումը ուղեկցում է զանգուածային տոնախմբութեան տեսարաններով, համաժողովրդական ցնծութեամբ, արծակի, ազատ ոտանաւորի եւ «չափաւ բանի» համադրութեամբ:

Աստուածածնի Վերափոխումը Դ. հարիւրամեակից պահպանուած պարակաւուն «Մարիամի Վերափոխման մասին» բնագրով է յայտնի դարձել: Շատ չանցած Եկեղեցին սկսել է տօնել Վերափոխումը կամ Նշումը, յարգել Աստուածածնի պատկերը:

Մեզ հետաքրքրող երկը կարելի է պայմանականօրէն երկու տեսարանի բաժանել: Գործողութիւնների վայրը նախ երկիրն է, ապա՝ երկինքը: Ստեղծագործութեան ծաւալումին իրենց մասնակցութիւնն են բերում Գաբրիէլ հրեշտակապետն իբրեւ երկնքի ներկայացուցիչ, եւ Պետրոս առաքեալը՝ այսպէս ասած՝ ժողովրդի, հանրութեան: Հանդես են գալիս տօնողների խմբերը: Իսկ սրբուհու պատկերը կոչուած էր մի տեսակ փոխարինելու բնորդին:

Ինչպէս ժամանակին Գաբրիէլ հրեշտակապետը Մարիամին աւետել էր Յիսուսի ծննդեան մասին, Մարաշեցու երկը նոյնպէս սկսում է հրեշտակապետի աւետումով. նա է ըստ Էուրթեան գլխաւոր հանդիսավարը:

Պանդխտութեանը ժամանակը լրացաւ, - ասում է հրեշտակապետը Մարիամին, - այժմ արի քո հայրենի ժառանգութիւնը, «Նախասահմանեալ աւուրքն կատարեցան: Հետեւեա՛լ ի գաւառն յորում բաղձայիր: Լինելո՛ք քո ի վայրդ ըստորին՝ որ է տեղի հանդիսի, գլրումն Էառ: Արդ՝

ե՛կ եւ ընկա՛լ զպսակն յաղթութեան: Չբարիոք մարտն մարտեար քաջութեամբ եւ ի մրցանակն եւս փութասցի՛ր: Չընթացսն կատարեցեր արիութեամբ, ժա՛մ է եւ յաղթանակին վայելման: ... Յուսով քաջապնդեալ հաստատեցար, ճեպեա՛ն յանապաղ ի հանդիպումս՝ որոց յուսայիրն» (թղ. 42ա): Եւ Աստուածամայրն աղօթքով դիմում է Որդուն (թղ. 42բ-44ա):

Տեսնելով, որ եկել է Տիրամօր Վերափոխման պահը, մաքսաւոր կոյսերը յայտնում են իրենց մտահոգութիւնը. «Ո՛վ մայր Լուսոյ եւ առազաստ սրբութեան, ահաւասիկ զքեզ ունեաք փոխանակ Տեառն մերոյ եւ Միածնի որդւոյ քոյ, եւ յամենայն վիշտս եւ ի նեղութիւնս՝ որ տիրասպանիցն գայր ի վերայ մեր՝ քեւ մխիթարեաք: Եւ արդ քո լքանելով զմեզ զի՛նչ լինիցիմք մեք՝ տկարքս... ո՛չ զոք ունելով օգնական, ո՛չ սփոփիչ ի տրտմութեանս, ո՛չ քաջալերիչ ի վիշտս, ո՛չ զօրացուցիչ ի տկարութիւնս» (44ա): Այստեղ է ի յայտ գալիս Աստուածածնի պատկերի պաշտամունքի խնդիրը: «Իսկ արդ՝ հրաւիրեալ սրբուհին ի փոխումս առ Որդին իւր, յայտնեալ աւետարանչին Յովհաննու զփայտն կիպարիս յորմէ կենսաբեր խաչն, եւ մեծաւ թախանձմամբ կերպածէ՛ւ զպատկեր Տիրամօրն առ ի կենալ նշխար կենաց մերոց առ անձուկ սրտին իւրոց՝ յոյժ բաղձացեալ աւետարանչին» (Յայսմաւուրք ըստ կարգի ընտրելագոյն օրինակի Յայսմաւուրաց Տեր-Իսրայելի, խմբագիր-հրատարակիչ Գրիգոր Փետրամալճեան, յՕրթագիւղ, 1834, Օգոստ. ԺԵ., Նաւասարդի Ե., [մասն Բ.,] էջ 79):

Շարունակությունը՝ էջ 8

Սկիզբը՝ էջ 4

Չարենցի ձեռագրերի կապակցությամբ Էմիլը գրում է. «Չեմ կարող ասել, թե ինչքան էր անցել Չարենցի բանտարկության օրվանից, բայց տունն ու հատկապէս Չարենցի աշխատասենյակը տակնուվրա էր արված: Հավանաբար եկել խուզարկել էին: Մենք՝ Վիգենի [խեչումյան] եւ Իզաբելայի [Չարենց] հետ իսկույն գործի անցանք եւ հավաքեցինք գրքերը, թղթերը, ձեռագրերը, մանր-մուր իրերը: Թղթերի եւ ձեռագրերի 20 թղթապանակ ստացվեց:

Իզաբելայի մոր՝ Աննայի ասելով՝ ձեռագրերի մի մասը Չարենցն ու նրա կինը պահ էին տվել Անիի անունով մի կնոջ եւ նրա ընկերուհուն (իետագայում պարզվեց, որ դա նկարչուհի Ռեզինա Ղազարյանն է եղել): Ըստ Ռեզինա Ղազարյանի տպագրված հուշերի՝ այդ ձեռագրերը բանտարկությունից առաջ Չարենցը պահ է տվել միայն իրեն»:

Միջանկյալ նշենք, որ Ռեզինա Ղազարյանը գրում է ոչ թե «բանտարկությունից առաջ» իրեն պահ տրված Չարենցի ձեռագրերի, այլ բանտարկությունից հետո Չարենցի ցուցումով իրեն վստահված թղթապանակների մասին:

Այնուհետեւ Էմիլը շարունակում է. «Թե ինչ եղան այդ քսան թղթապանակների մեջ դասավորածները, հայտնի չէ, որովհետեւ հետագայում Իզաբելային հատկացված նոր բնակարանում կամ սենյակում մնացել էին միայն մեկ թղթապանակի չափ ձեռագրեր, լուսանկարներ եւ Չարենցի սեւ կազմով «Երկեր»-ի իր իսկ ձեռքով ուղղված օրինակը (որի մեջ կային շատ մակագրություններ ու ձեռագիր բանաստեղծություններ)»:

Չարենցին ձեռքակալելուց հետո նրա բնակարանը հատկացնում են պրոլետգրող Անուշավան Վարդանյանին, իսկ Չարենցի կնոջն ու երեխաներին տեղափոխում «Ինտերնացիոնալ» շենք (Մաշտոցի պողոտա, օպերայի դիմաց, որի առաջին հարկում մի ժամանակ «Հանքային ջրեր» խանութն էր): Իզաբելային բանտարկելուց հետո այստեղից նրա ծնողների տուն են տեղափոխում եղած-չեղածը, նաեւ ձեռագրերն ու գրքերը: Էմիլը շարունակում է. «Չարենցի իրերը տեղափոխելիս, ավա՛ղ, այլեւս չկային այն ձեռագրերը, որոնք ես, Վիգենը եւ Իզաբելան դասավորել էինք քսան թղթապանակների մեջ...

Ե. ՉԱՐԵՆՑԻ ՉԵՌԱԳՐԵՐԻ ԵՎ ՀԱՐԱԿԻՑ ԽՆԴԻՐՆԵՐԻ ՄԱՍԻՆ Նվիրվում է Ե. Չարենցի ծննդյան 120-ամյակին

Մնացել էին միայն մի բուռ թղթեր, ձեռագրեր, լուսանկարներ, մանր-մուր իրեր... Վախենալով, թե կարող են հանկարծ գալ տեսնել եւ տանել նաեւ այդ թանկ մատուցները՝ ես ու Վիգենը խոհանոցի պահարանի հատակի տակ մի ուրիշ տախտակ էլ մեխեցինք, երկու տախտակների արանքում թաքցրեցինք այդ ամենը եւ մի կերպ այդ պահարանն ու մնացած իրերը տեղափոխեցինք Իզաբելայի հարազատների տուն: <...>: Ես ու Վիգենը պահարանի տակ մեխած մեր տախտակը պրկեցինք եւ Իզաբելայի հորը խնդրեցինք. «Ես թղթերն էլ մեզ տուր...»: <...>: Բայց նա չովեց, երեւի վախենալով, թե կիմանա ու կհարցնեն: Միայն թույլ տվեց, որ տանենք տուն՝ կարդանք ու բերենք...

Տարանք, հափշտակությամբ կարդացինք, արտագրեցինք եւ մեծ մասը ետ բերինք [այսինքն՝ մի մասը ետ չի բերվել]: Հետո իմացանք, որ գրականության թանգարանի անունից եկել ու տարել են...

Ինձ մոտ եղածի մի մասը ես 1940 թվականին տվեցի Ռուբեն Մաքսյանին (Տերյանի գրքի հրատարակման նախօրյակին), իսկ մյուս մասը՝ <...> Արփենիկ Չարենցին («Երկեր»-ը, շատ լուսանկարներ, մանր-մուր իրեր եւ այլն)» («Չարենցի հետ: Հուշեր», մաս 2, Ե., 2008, էջ 188-191):

Դժբախտաբար, այդ ժառանգության հետ Էմիլը չվարվեց այնպես, ինչպես վայել էր Չարենցին: Էմիլն ինքը պետք է այդ ամենը հրապարակեր, գրեր մի բացատրական առաջաբան, պատմեր ամեն բան ինչպես եղել է եւ եղածը ներկայացներ հանրությանը: Էմիլն ապրեց նաեւ անկախության տարիներին, այլեւս չկային նախկին գաղափարական սահմանափակումն ու վախը: Դրանով նա փառքով կասակեր 1951-ին Ստալինյան երկրորդ աստիճանի, 1976-ին ԽՍՀՄ Պետական մրցանակների դափնիներով զարդարված իր անունը: Էմիլն այդպես չվարվեց...

Էմիլի պահած Չարենցի ինքնագրերն անցան նրա կրտսեր որդուն:



Չարենցի ժառանգության մնացած հետքերը: Յուրաքանչյուր քալլ մեզ պետք է մոտեցնի Եղիշե Չարենցին եւ ճշգրտի ու լրացնի նրա կյանքի ու գործի որեւէ դրվագ: «Երկերի ժողովածու»-ի (1962-1968) վեցհատորյակին, «Անտիպ եւ չհավաքված երկեր»-ին (1983), «Նորահայտ էջեր»-ին (1996) եւ «Գիրք մնացորդաց»-ին (2012) պետք է ավելանա եւս մի նոր հատոր ու ի մի բերի նրա ժառանգության անհայտ մասը: Այդ ամենը նոր խմբագրությամբ պետք է հիմք դառնա Չարենցի վաստակի գիտական հրատարակության տասը հատորյակի համար:

Անտարակույս է, որ չարենցյան էջեր դեռեւս կան առանձին անձանց գգրոցներում, ովքեր պիտի բարի լինեն, եւ ինչ որ պահպանվել է, հանեն ասպարեզ: Այդ նպատակով ժամանակագրական հերթականությամբ ներկայացնենք Չարենցի բացակա ժառանգության հասցեները: Դրանց մի մասն անվերադարձ կուլ է գնացել ժամանակին, իսկ մի զգալի մասն ունի իր որոշակի պատկանելությունը, եւ պետք է հուսալ, որ դրանք երբեւէ լույս աշխարհ կգան:

Գ. Մահարու եւ այլոց հիշողություններից հայտնի է, որ 1920-ական թթ. սկզբներին Չարենցը գրել է 50 գագեղ եւ թողել միայն մեկը՝ նվիրված մորը: Մյուսների ոչնչացումը պատճառաբանել է նրանով, թե հիմա կյանքը փոխվել է, եւ գագեղ գրելու ժամանակ չէ (տե՛ս Գ. Մահարի, Երկերի ժողովածու, II, 1967, էջ 367-368): Նույն կերպ գրագով Գառնիկ Զալաշյանին խոստացել է մեկ գիշերվա ընթացքում գրել 100 քառյակ, սակայն գրել է 65-ը եւ հաջորդ օրը՝ կարդալուց հետո, բոլորն էլ պատռել: «Կարծեմ ճղածներս հավաքել պահել են» (Հիշողություններ Եղիշե Չարենցի մասին, 1961, էջ 387),- եթե հուշագիրը ճիշտ է մտաբերում Չարենցի այս խոսքը, ուրեմն, հնարավոր է, որ դրանք կան:

1922-ին Չարենցն ապրել է Երեւանի Օմար Խայամ փողոցում գտնվող «Ֆրանսիա» հյուրանոցում, ուր այդ տարիներին (մինչեւ «Ինտուրիստ»-ը) ապրում էր նաեւ Հայաստանում վերահաստատված հայ մտավորականությունը: Ըստ Դանիել Դգունու հուշերի՝ Չարենցը տրիոլետներ էր գրում այդ դրյակի եւ նրա մարդկանց մասին. նրա կարծիքով՝ դրանք «չեն պահպանվել նրա ժառանգության մեջ» (ԳԱԹ, ՉՖ, թիվ 221): Նրա հիշողությամբ՝ դա տրիոլետներով գրված պոեմ էր եւ ընդգրկում էր 5-6 էջ: Դիպաշարը՝ արեւելյան դրյակում ապրող դաժան արքա եւ չքնաղ թագուհի, թագուհուն անհույս սիրահարված բանաստեղծ, որ թափառում է դոյակի շուրջը: Արթուն պահակներին խաբելով՝ նաժիշտները բանաստեղծին ներս են տանում: Այդ գաղտնի տեսակցությունների մասին տեղեկանում է արքան եւ հրամայում դավաճան թագուհուն գահավիժել անդունդը: Իսկ պոետը խելագարվում ու սարերն է ընկնում: Ընդհանուր ուրվագծով այս անհայտ պոեմը նախապատրաստել է «Ասպետական» ռապսոդիայի ծնունդը:

Շարունակելի

Դավիթ ԳԱՄՊՐՉՅԱՆ

Բանասիրական գիտ. դոկտոր, պրոֆեսոր

Սկզբը՝ էջ 5

Այդպիսին է Չարենցի վերաբերմունքը Կարսի պաշտպանությունը դասալքությամբ քանդող հայազգի բոլշևիկների, «վակ-զալի մեյդանի բաշխուղուկներին», սրանց նպատակամղող կարողությունների, օրհորդ սաթների ու նրանց օտարերկրյա պարագլուխների նկատմամբ:

Պատմությունը ժամանակ առ ժամանակ կրկնվում է: Եվ որքան արդիական ու մեր օրերին համահունչ են չարենցյան շատ բնորոշումներ, որ արտահայտված են ինքնակերպավորված հեղինակի անմիջական խոսքում կամ վիպական հերոսների արարքների ու խոսքի հանդեպ նրա հեղինակային վերաբերմունքում:

Պատերազմի եւ խաղաղության խնդիր այն ժամանակներում էլ է եղել, եղել է նաեւ, այսպես կոչված, «գրավյալ տարածքների» խնդիր: Հազիվ իրականացել էր մեր ժողովրդի դարավոր իղծը, մեծ գոհերի ու ծանր կորուստների գնով վերականգնվել էր հայոց պետականությունը՝ Հայաստանի Առաջին Հանրապետությունը, որը Չարենցը մի ներքին հպարտությամբ անվանել է **Նաիրապետություն**:

Պատմաբաններն այսօր են աղաղակում, թե Կարսի անկման եւ դրանով իսկ պատմական հայրենիքի կործանման մեղավորներին պետք է մեր մեջ փնտրել: Բայց Չարենցն այդ ողջամտու-

ԻՆՔՆԱԿԵՐՊՈՎՈՐՎԱԾ ՉԱՐԵՆՑԸ «ԵՐԿԻՐ ՆԱԻՐԻ» ՎԵՊՈՒՄ ԵՎ ԿԱՐՍԻ ԱՆԿՈՒՄԸ ՆՐԱ ՆԱՅԱՅՔՈՎ



թյունն ունեցել է վեպը գրելիս՝ 1921-24 թթ.: Չգուցի որ սթափ քաղաքագետի հայացքով նա խորացել է աղետի պատճառների մեջ, եւ եթե պատմագետները միայն փաստերի լեզվով են խոսում, ապա Չարենցն այդ փաստերի վրա ստեղծել է մարդկային բնավորությունների մի ամբողջ պատկերասրահ, ընդհանրացված գեղարվեստական կերպարներ: Ընթերցողը «Նաիրապետության» կողքին տեսնում է նաեւ պետական մտածողությամբ օժտված իրական խորհրդի, որ մտածում էին՝ իրենց պետությունը կարող էր

գոյատևել միայն ինքնիշխանությամբ, ինքն իրեն պաշտպանելով, հարեւանների հետ դիվանագիտական արժանապատիվ հարաբերություններ հաստատելով: «Այսպիսով, ինչպես տեսնում եք,- գրել է Չարենցը,- ամեն ինչ փոխվել էր եւ ընդունել միանգամայն **Նաիրայի կերպարանք**: Նաիրին՝ էր, հին, երազյալ, հավիտենական Նաիրին, որ տարիների մուծից, մշուշից ելած՝ առել էր իրական կերպարանք,- ինչպես կասեր կենտրոնաւղեղասարդ Մագուրի Համո: - Եվ ամեն ինչ լավ էր գնում, նույնիսկ կարելի էր ասել, որ **կա-**

տարյալ հանգիստ եւ խաղաղություն կտիրեր Նաիրյան այդ քաղաքում եւ շրջանում, եթե չլիներ մի շարք **ստոր, անպատկառ, Նաիրադավաճան** մարդիկ, որոնք խանգարում էին նորաստեղծ Նաիրապետության հանգիստը» (5, 232, ընդգծ.՝ բնագրի): Ի դեպ, հեղինակը, ասվածի կարեւորության նկատառումով, ընդգծված արտահայտությունն իրար հետեւից կրկնել է եւս մի քանի անգամ՝ այլ կարեւոր ասելիքների հետ միահյուսելով, ինչն ասելիքը բազմապատկելով ցայտունացնելու եւ առավել ընկալելի դարձնելու ո՛չ սովորական ոճական հնարանը է. «Եվ ո՞վ գիտե՝ կկատարվե՞նա՞ր այդպիսի հետաքննարկում ու ահավոր դեպքերը, եթե չլիներ այդ **ստոր, դավաճան, անպատկառ** մարդիկ: Երեւակայո՞ւմ եք՝ դրանք՝ այդ ստոր, դավաճան, անպատկառ մարդիկ, դեմ էին **գրավված վայրերի**» պաշտպանության, ինչ-որ խաղաղություն էին պահանջում այդ **ստոր, դավաճան, ազգուրաց** մարդիկ, երբ դեռ չէր գետնահարված **նստիք**, ավելին՝ երբ իր **վերջին հորդանքերը** հավաքած՝ թափփուկ բանակներով պատրաստվում էր **«գրավված վայրերը»** խուժել, վերստին հրի ու սրի մատնել այնքան դժ-

վարություններով **վերջապես ազատագրված** երկիրը Նաիրի...Հասկանո՞ւմ եք՝ **դուռը**, ինչպես ասում էր Հաջի Օսիկ Էֆենդին, երկնային թռչունը եկել, իր ոտքով մեր ձեռքն էր ընկել, իսկ այդ ստոր պարոնները պահանջում էին, որ մենք մեր ձեռքով վերցնենք ու բաց թողնենք այդ **դուռը**՝ հանուն ինչի՞, կամ ինչպես Հաջի Էֆենդի Մանուկոֆն էր ասում - **անունն ի՞նչ դնենք**» (5, 233, բոլոր ընդգծ.՝ բնագրի): Այսինքն՝ հեղինակը համամիտ է իր հերոսի՝ Հաջի Մանուկոֆի խոսքին: Իսկ հանուն դեռեւս չտապալված արյունարբու Հավիտենական հիվանդի հետ խաղաղության նրան տարածքներ զիջելու բոլշևիկյան «Նաիրուրաց տխմարությունը» միայն մեկ անուն եւ չարենցյան մեկ որակում ունի միայն՝ **«Ազգային դավաճանություն»**, որը բնագրում դարձյալ ընդգծված է: Տեսեք, թե չարենցյան բնորոշումը որքան է արդիական, որ կարող է նույնիսկ շփոթել հանուն խաղաղության Ադրբեջանին ազատագրված տարածքներ զիջելու այսօրվա քարոզչության հետ:

Շարունակելի
Սամվել ՄՈՐԱՐՅԱՆ
Բանասիրական գիտ. դոկտոր,
պրոֆեսոր

Սկզբը՝ էջ 5

Սիմեոնը մի առանձին գրությամբ Գրիգոր աղային հայտնում է նաեւ թղթագործների խաբեության մասին՝ ավելացնելով, որ չնայած նրանք տեղի աշակերտներին ոչինչ չեն սովորեցրել, այնուհանդերձ վերջիններս կարողացել են ինքնուրույն ուսանել թղթագործության արվեստը եւ այժմ նրանցից լավ են թուրթ պատրաստում:

Որպես ապացույց՝ նա Գրիգորին է ուղարկում 4 թերթ թուրք՝ 2-ը առաջին անգամ արտադրած փոքր տեսակից, 2-ն էլ հետո արտադրած մեծ տեսակից, նաեւ 2 թերթ տպած: Գործարանում պատրաստված թուրքը կրում էր հետեւալ լուսադրոշմ-տարբերանշանները. մի կողմում՝ «Էջմիածին» բառը եւ «Ս. Կ.» տառերը («Սիմեոն կաթողիկոս» բառերի սկզբնատառերը), մյուս կողմում՝ «թ. ՌՄԻԵ» (1776) եւ «Գ. Մ.» տառերը (գործարանի ծախսերը հոգացող Գրիգոր Միջայելյանի անվան սկզբնատառերը):

Գրիգոր աղան անգլերենից թարգմանել էր 5 մուրհակագիր եւ ուղարկել, որ սրբագրեն, տպեն եւ հետ ուղարկեն իրեն՝ իբրեւ նմուշ: Կաթողիկոսը, յուրաքանչյուրից 4 հատ տպել տալով, ուղարկում է նրան՝ միաժամանակ հայտնելով, որ թե՛ Տոնացույցները եւ թե՛ «Չքոսարան» գրքույկը եկեղեցիներին բաժանել են անվճար:

Սիմեոն կաթողիկոսի հիմնած տպարանում գործել է ձեռքի 2 մամուլ: Հայտնի չէ, թե դրանք երբ են գործածությունից դուրս եկել: Գուցե երբ նոր՝ կատարելագործված մեքենաներ են ստացվել, Սիմեոն հայրապետի ձեռքի


մամուլները դարձել են անգործածելի եւ մատնվել անուշադրության: Հետագայում անփութության ու անհասկացողության պատճառով այդ մամուլների տախտակները տգետ մարդկանց կողմից կոտրվել են. դրանցից մնացել են միայն 2 մեծ պտուտակները, որոնք էլ հետագայում անհետացել են: Միայն 1910 թ. Արտակ եպիսկոպոս Սմբատյանը եւ վարպետ Ղեւոնդ Ղարախանյանը փնտրում-գտնում են դրանք եւ հանձնում հնության թանգարանին:

Տպարանն ու գործարանը Սիմեոն Վեհափառի օրոք բավական ծաղկյալ վիճակում էին: Սակայն նրա վախճանից հետո՝ Ղուկաս Կարենցի կաթողիկոսի օրոք (1780-1799 թթ.), Արարտայան երկիրը հայտնվում է պատերազմների ճիրաններում: Տպարանը շարունակում է գործունեությունը, թղթի գործարանը, ավաղ, պարսպից դուրս մնալու պատճառով ավերվում է. ասպատակող զորքերը հափշտակում են երկաթե ու պղնձե գործիքները, ինչի հետեւանքով էլ գործարանն ամբողջովին դադարում է գոյություն ունենալուց: Հովհաննես Շահխաթունյանցը գրում է, որ դրանից հետո տպարանի ծուլված տառերը հայտնվում են տարբեր քաղաքներում: Մեր հայրենակիցները, բարեբախտաբար, գերեվարողներից գնում են ծուլածո մետրայան տառերը եւ պատերազմից հետո վերադարձ-

նում Մայր Աթոռին: Տպարանը, թեպետ գրկվել էր Նախկին հզորությունից, այնուհանդերձ շարունակում էր լույս ընծայել եկեղեցական եւ այլ բնույթի գրքեր՝ ապահովելով այդ օրերի մեր հոգու հացի մի մասը:

Թե ստույգ երբ է ավերվել գործարանը, հայտնի չէ, սակայն 1784 թ. գարնանը առաջարկվում է այն վերանորոգել. Նախաձեռնողը Կ. Պոլսի նվիրակ Իսահակ վարդապետն էր, ում վրա էր, հավանաբար, դրված Էջմիածնի համար թուրք ձեռք բերելու եւ առաքելու դժվարին պարտականությունը: Նա 1784 թ. փետրվարին կաթողիկոսին գրում է, որ ինքը նպատակ ունի դրամ հավաքելու՝ թղթի գործարանը վերականգնելու համար: Սակայն Ղուկասը նրան պատասխանում է. «Իսկ վասն թղթատանն, որ ցաւելով գրեւ, մի՞թե մեք ոչ ցաւիմք, այլ ժամանակս ձեռնտու չէ, մանաւանդ խղճալի Նիկողայոսն եւ վախճանեցաւ եւ նոյն արհեստին այլ գիտող ոչ գոյ, վասն որոյ թե հետեւիլ ես ջանասցուք, անօգուտ լինի: Ուրեմն եւ դու, սիրելի իմ, մի՛ աշխատ լինիր ի հետեւումն նիւթածողովութեան, զի յարդեանս յոյժ դժուար է ձեռնարկելն, ապայն Աստուած հոգացե՛»:

Տպարանի երախայրին համարվում է Սիմեոն Երեւանցու «Գիրք աղօթից, որ կոչի Չքոսարան հոգեւոր» գրքույկը (1772 թ.), այն, բնականաբար, նաեւ հայաստանյան գրատպության ա-



ռաջնեկն է: XVIII դ. լույս ընծայված գրքերից է Հովսեփոս Եբրայեցու «Յաղագս պատերազմին հրեից ընդ հռովմայեցիս»-ը (1787 թ.): XIX դ. առաջին տասնամյակներում անընդմեջ մղվող պատերազմների պատճառով տպագրվում է միայն «Սաղմոսը» (1819 թ.): 1833-1846 թթ. իրատարակվում է 18 անուն գիրք, այդ թվում՝ Հ. Շահխաթունյանցի «Ստորագրութիւն Կաթողիկէ Էջմիածնի եւ հինգ զաւառացն Արարատայ» (1842թ.), Կ. Շահնազարյանցի «Արհեստ թուաբանութեան» (1842 թ.), Ի. Կայդանովի «Հրահանգ համաշխարհական պատմութեան» (1844 թ.) եւ այլն: Էջմիածնի տպարանը նոր վերելք է ապրում Գեւորգ Դ կաթողիկոսի ժամանակ՝ 1866 թ.: «Արարատ» ամսագրի, «Ճառոց», «Ձայնագրել շարական», «Ձայնագրել երգեցողութիւնը սրբոց պատա-

րագի» աշխատություններին զուգահեռ լույս են տեսնում պատմաբանասիրական, գրական երկեր՝ Աբրահամ Կրետացու «Պատմագրութիւն անցիցն իւրոց եւ Նատր-շահին պարսից» (1870 թ.), Ուխտանեսի «Պատմություն Հայոց» (1871 թ.), Ս. Շահումյանցի «Ընտիր պատմութիւն Դավիթ Բեկին եւ պատերազմացն հայոց Խափանու» (1871 թ.), Սիմեոն Երեւանցու «Ձամբո» (1873 թ.), Աբել Մխիթարյանցի «Վաղարշապատ, քաղաքամայր Հայաստանի» (1874 թ.), Մխիթար Գոշի «Դատաստանագիրք հայոց» (1880 թ.), Առաքել Դավրիժեցու «Պատմութիւն» (1884 թ.) եւ այլն: 1895-ին Մայր Աթոռի տպարանը Պետերբուրգում մասնակցում է 1-ին համառուսաստանյան ցուցահանդեսին եւ արժանանում գովասանքի:

Շարունակությունը՝ էջ 8

ԷԶՄԻԱԾՆԻ ՏՊԱՐԱՆԸ ՈՒ ԹՎԹԻ ԳՈՐԾԱՐԱՆԸ

Սկիզբը՝ էջ 6

Վերափոխումից անմիջապես առաջ Տիրամօրը ճանապարհողները բերում են նրա պատկերը եւ խնդրում. «Ընկա՛լ զպատկերս զայս նկարեալ ի Յօհաննէ եւ դի՛ր հանդէպ աստուածագարդ եւ հրաշատիպ դիմացդ եւ օրհնեա՛ր՝ զսա օրհնութիւնս հոգեւոր՝ հեղլով ի սա զշնորհս Յոգ-տոյն եւ տպաւորելով զգօրութիւնս աստուածային, եւ տո՛ւր զսա նշխար կենաց աշխարհի յետ Վերափոխման քո, որպէս եւ Միածինն քո զփայտ չարչարանաց իւրոց ետ նշան փրկութեան աշխարհի եւ ախոյեան յաղթող եւ անպարտելի ընդդէմ դիւացն գնդի, զի լիցի առ մեզ ի սփոփանս յետ ելիցն քոց, զի տեսնելով զսա միութարեսցուք, որպէս թէ զքեզ իսկ տեսնեմք, եւ ամենայն հաւատացեալք՝ որք ի-ցեն յաղտ հիւանդութեան հոգւոյ եւ մարմնոյ՝ ի ձեռն քոյ բարեխօսութեան սովաւ գտցեն զառողջութիւն յիւրաքանչիւր վտանգից եւ մանաւանդ յերուսաղէմ» (46բ):

Սրբազաններն ու «ամենեցուն փրկողի կամքը կատարողները» Յիսուսի խաչի հետ են համեմատում Տիրամօր պատկերը, որ նաեւ բուժող նշանակութիւն պիտի ունենար:

«Առաքեա՛ր՝ զշնորհս ամենակարօղ զօրութեանդ ի փայտեղէն անօթս այս, եւ առա՛ զսա յառողջութիւն հիւանդաց, ի հալածումն դիւաց, ի բժշկութիւն ամենայն վտանգելոց հոգւով եւ մարմնով: Չի յամենեցունց առ հասարակ փառաւորեսցի անուն քո»,- խնդրում են մաքսաւորները (48ա): Տիրամայրը, սակայն, համեստօրէն հրաժարում է, յիշեցնում, որ պատեհ չէ, իր կարողութիւնից վեր է այդ խնդրանքը կատարելը, մանաւանդ որ Աստուած նրանց տուել է «զգօրութիւնս աստուածագործ նշանաց բժշկելոյ զցաւս եւ հանելոյ զդէւս»:

Սակայն, տեղի տալով աղաչանքներին, այնուամենայնիւ, Աստուածածնին համոզում են աղօթքով դիմել Աստծուն, եւ ի կատարումն Աստուածամօր աղերսանքի՝ «ծայն լսելի եղել, որ ասեր. «Անարա՛տ տաճար եւ անքիծ առագաստ մարդեղութեան իմոյ, ահա՛ կատարեալ են խնդրուածք քո՝ զոր հայցեցեր: Եւ եղիցի պատկերացոյ բժշկութիւն ամենայն ախտացելոց եւ ի հալածումն դիւաց՝ որք հաւատով ապաւինին ի քոյ բարեխօսութիւնդ, եւ դու եկեցի՛ր մեծաւ փառօք ի նախապատրաստեալ հանգիստ արքայութեան՝ որ անտեսն եւ անմտանելին է եղականաց» (48ա): Աստուածամօր պատկերն օծուում է սրբագործող յատկութեամբ ու այնուհետեւ դառնում պաշտամունքի առարկայ: «Եւ լոյս ամպեղէն ի վերուստ խաչանման կաթեաց ի պատկերն», որ եւ ստացաւ ակնկալուած գօրութիւնը (48ա): Այդպիսով սկիզբ տրուեց Աստուածամօր պատկերի պաշտամունքին:

ՄԱՐԻԱՄ ԱՍՏՈՒԱԾԱԾՆԻ ՎԵՐԱՓՈԽՄԱՆ ՏՕՆԸ ԺՈՂՈՎՐԴԱԿԱՆ ԿԵԱՆՔՈՒՄ



Այնուհետեւ Սրբուհին մտնում է սենեակ, պատրաստում Վերափոխման, ապա՝ «առաքելոցն ակումբ առեալ զմահծօքն՝ հանդերձ մաքուր կուսանօքն եւ բազմութեամբ հաւատացելովքն, ջահիւք լուցելովք եւ լապտերօք բորբոքելովք իսկէին ըզցայգն ամենայն յերգս հոգեւորս եւ պատշաճ վարկեալ սրբազանիցն խօսիլ բանս դրուատեաց ի Փոխումն Տիրամօրն եւ ի խրատ եւ յօգտութիւն ժողովորդեան» (48բ):

Եւ սկսում է մեծ ուրախութեան տօնախմբութիւնը, Պետրոս առաքեալը ցնծագին խօսքերով դիմում է Մարիամին. «Ուրախ լեր...»:

Բանաստեղծական ինքնեկ, բնահորդ ներշնչանքով գրուած դրուատն ունի, ինչպէս ասացինք, երբեք կարգի շարադրանք. պարզապէս արձակ, որով գրուծ են «հեղինակային նշագրումները»՝ կշռութաւոր արձակ, եւ, վերջապէս, երգային հատուածները՝ ազատ ոտանաւոր:

Յեղիսակն այստեղ եւս նոյն մտահոգութիւններն ու խնդրանքներն է արտայայտում, ինչ տեսնում ենք Վայգրքի մէջ, մաղթելով աշխարհին խաղաղութիւն, «զի-նուորաց՝ արիութեամբ պատերազմիլ ընդ դէմ հակառակաց ճշմարտութեան, դատաւորաց՝ արդարութեամբ դատել առանց ակնառութեան եւ կաշառաց...» (61ա): Անդրադարձն այս խնդիրներին նորից ու նորից դրանց՝ մտահոգիչ լինելու վկայութիւնն է: Յեղիսակը ժամանակի ցաւոտ հարցերի կողքին այս անգամ չունի պատերազմական գործողութիւններին,

արհաւիրքների յիշատակութիւն. սա թերեւս նշանակում է, որ իրօք տոյն երկը գրուած է կա՛մ 1149-ի մարտական գործողութիւններից շատ առաջ եւ կա՛մ բաւականաչափ ուշ:

Գրիգոր Մարաշեցին ոչ թէ պատմում, այլ ներկայացնում է իր հերոսուհու կեանքի թերեւս կարեւորագոյն հանգրուանը՝ Վերափոխումը, համաժողովրդական տօնախմբութեան շքեղ պատկերի շրջանակի մէջ: Այդ տօնակատութեանը մասնակցում են նաեւ վերին ուժերը՝ առաւել ընդգծելով երեւոյթի նշանակալիութիւնը: Չուարթ տրամախօսութիւններն ինքնակայ բանաստեղծութեան հանգամանքով են դրոշմուած, իսկ համընդհանուր ցնծագին պարերը, օրհներգութիւնը կատարեալ ու ներդաշնակ են դարձնում տօնը: Այս կարգի հատուածներն անկասկած ունեցել են երաժշտական ձեւաւորում, ինչպէս տաղերգութեան շատ նմուշներ, «մեծ կտաւի» գործերը (ասենք՝ Առաքել Սիւնեցու «Ադամ-գիրքը»): Դրուատն ըստ էութեան թատերային ստեղծագործութիւն է, որի իրապաշտական տեսարանները կենդանութիւն են հաղորդում ամբողջ ստեղծագործութեանը: Յեղիսակին օգնութեան են գալիս Յին ու Նոր Ուխտերի որոշ դրուագներ: Յատկապէս ներգործուն պիտի լինէր Երգ երգոցի պատկերային համակարգի ներառումը խմբական երգերի մէջ, երբ «Թագաւորի մայրը» եւ «տիեզերքի դժխոյն» առաջնորդում էր «ի բարձունս»: Մարաշեցին բազմութեան ցնծալից ուրախութիւնը, շքեղ տօնախմբութիւնը պատկերում է յիշաւի մեծաշուք պարերով ու նուագերգութեամբ, հմտօրէն օգտագործելով յատկապէս Երգ երգոցը:

*Ահա գեղեցիկ ես, մերձաւոր մեր,
Ահա ես գեղեցիկ. աչք քո աղաւնոյ,
Ծնօտք քո իբրեւ զտատրակի,
Պարանոց քո իբրեւ զմանեակ
Եւ որպէս շուշան ի մէջ փշոց:
Քո՛յր մեր, ի մէջ դստերաց
Նմանութիւն ոսկւոյ արասցուք քեզ՝
Հանդերձ կիտածուկք արծաթոյ,
Մինչեւ Արքայ ի գիրկս իւր ընկալցի քեզ:
50բ*

Ս. Գրքի այլեւայլ ներբողական հատուածների օգտագործումը միտուած է ամբողջացնելու Աստուածամօր անթերի գեղեցկութիւնը, եւ բանաստեղծը, չափաւորելու համար երկրային բարեմասնութիւնների գովքը՝ գործող անձերից մէկի

բերանով անում է մի վերջին դիտարկում. «Սուտ հաճութիւն եւ ընդունայն գեղ կնոջ ո՛չ գոյ ի քեզ», - վերստին ընդգծելով հերոսուհու եզակիութիւնը (55ա): Աստուածաշնչական տարագումով հերոսուհուն ներկայացնելու այս եղանակը շատ բնորոշ է նորագոյն ժամանակներին՝ իբրեւ ոճաւորում:

Իր հերթին Աստուածածինը Յիսուսին դիմում է իբրեւ հասարակ մահկանացուի: Եւ հաւաքուած բազմութիւնը մեծ, խանդավառ տօնախմբութեամբ ու երկիւղով երկրպագեց՝ պատուելով պատկերը եւ ճանապարհեց՝ Աստուածամօրը՝ միանալու «ի պարս հրեշտակապետական բանականացն» (49բ):

Նոյնպիսի ոգեւորութեամբ են ընդունում Սրբուհուն նաեւ վերին ուժերը՝ «սիրայորդոր բաղձանօք ի պաշտօն փառատրութեան, թագազարդեալ արքայուհոյն առաջնորդէին, ի լուսաճեմ կայանս իւրեանց ընկալեալ՝ հրճուալի տօնախմբութեամբ վերապատուէին» (52բ): Իրենց իրեղէն բերաններով վերին ուժերը ներբողում են Բանի մարմնաբանին, Բարձրեալի փառքի տաճարին (53ա)՝ բարձրացնելով նրան գօրութիւնից գօրութիւն, փառքից փառք, մինչեւ ամենավերին՝ երկնից թագաւորութիւնը:

Իսկ Աստուածամայրն անհամբեր է, շտապում է վերել, իր Բաղձալիին հասնելու:

Միածինն Ինքը նոյնպէս գովասանական խօսքերով է դիմաւորում Իր ծնողին, եւ նրան իրաւորում է «ի գերարփի եւ յանպատում լուսաճեմ խորանս», որ «ակն ո՛չ ետես, եւ ունկն ո՛չ լուաւ» եւ որ սկզբից եւեթ պատրաստուած էր Մարիամի համար (55ա):

Աւարտում է Վերափոխման հանդիսաւոր արարողութիւնը, հեղինակը հարկ է համարում շարունակել. «Եւ մեք իմանալի խորանիս զաղջատիմաց բանի մերոյ **ընծայս մատուցուք՝ ասելով...**». սրան անմիջապէս յաջորդում է [ենթա]վերնագիր, որ չի բացառում շարունակականութիւնը. «Նորին Գրիգորի ասացեալ» (թղ. 55ա) եւ ներբող է Աստուածածնին: Վերջին պարբերութիւնը, որ ընդգծել ենք, սրա իմնաւորումն է, եւ գործ ունենք ոչ թէ նոր մի ստեղծագործութեան, այլ Գովքի վերջաբանի, ամփոփման հետ: Թերեւս իր հերթին սրան պիտի յաջորդի Նոր Տնուայի թիւ 430 Ձեռագրի պարունակածը՝ «Մաղթանք աւարտ բանի Վերափոխման Աստուածածնին» բնագիրը, որ առայժմ անծանօթ է մեզ (*Նորայր Ծովական*, Վանատուր, էջ 183): Ինչեւէ, կարելի է արձանագրել, որ Մարաշեցու տոյն երկը հայ իրականութեան մէջ մեզ հասած թերեւս առաջին ամբողջական, ինքնուրոյն «թատերային» ստեղծագործութիւնն է, որ միստերիայի բնոյթ է կրում եւ հետաքրքրական է շատ կողմերով:

Արշակ ՄԱՂՈՅԵԱՆ
Բանասիրական գիտ. դոկտոր

ԷԶՄԻԱԾԵՆԻ ՏՊԱՐԱՆԸ ՈՒ ԹՊԹԻ ԳՈՐԾԱՐԱՆԸ

Սկիզբը՝ էջ 7

1888-1889 թթ.՝ Ամենայն հայոց կաթողիկոս Մակար Ա Տեր-Պետրոսյանի օրոք (1885-1891 թթ.), կառուցվում է տպարանի նոր շէնքը, որտեղ էլ մինչ օրս գտնվում է տպարանը: Ծնեքը սկզբում միահարկ էր. երկրորդ հարկը կառուցվում է ավելի ուշ. հարավարեւմտյան մասում կա մի անկյունքար՝ նվիրված Մակար Ա կաթողիկոսին: Տպարանը համալրվում է տառածուլական, տպագրական նոր մեքենաներով, հարստանում տարբեր լեզուների տառաւեսակներով:

XIX դ. վերջին եւ XX դ. սկզբին Էջմիածնի տպարանը լոյս է ընծայում Մանուկ Աբեղյանի «Հայ ժողովրդական առասպելները Մովսէս Խորենացու հայոց պատմութեան մէջ» (1899 թ.), «Աշխարհաբարի քերականութիւն» (1906 թ.), «Աշխարհաբարի շարահյուսութիւն» (1912 թ.), Հակոբ Մանադյանի եւ Հրաչյա Աճառյանի «Հայոց

Նոր վկաները» (1903 թ.), Կոմիտասի եւ Աբեղյանի «Հազար ու մի խաղ» (1905 թ). եւ այլ աշխատութիւններ:

Հայաստանում խորհրդային կարգերի հաստատումից ամիջապէս հետո 1920 թ. դեկտեմբերի 17-ի դեկրետով Էջմիածնի տպարանը հանձնվում է Լուսժողկոմատի տնօրինութեանը: 1959-1962 թթ. երջանակահիշատակ Վազգեն Ա կաթողիկոսի նախաձեռնությամբ եւ ամերիկահայ համայնքի նվիրատվությամբ տպարանի շէնքն ամբողջովին վերանորոգվում է՝ համաձայն ճարտարապետ Ա. Գալիկյանի ու ինժեներ Ա. Մատիսյանի նախագծի: Զանդվում եւ վերակառուցվում է երկրորդ հարկը. օգտագործվում են միագույն քարեր, որպէսզի երկրորդ հարկը ճարտարապետորեն համապատասխանի առաջին հարկին: Այդ ընթացքում տպարանը համալրվում է ժամանակակից նոր տպագրական սարքերով:

Այսօր Էլ Սուրբ Էջմիածնի տպարանը, Մայր Աթոռի հրատարակչական բաժնի տնօրինությամբ, շարունակում է իր արդյունավոր գործունեությունը՝ սերունդների սեփականությունը դարձնելով հայ մշակույթի ու գիտության գոհարները, որ դարերի ընթացքում երկնել է ազգի համայնական հանճարը: Մայր Աթոռ Սուրբ Էջմիածնի հրատարակչական բաժինը հավատացյալների համար ամեն տարի հրատարակում է բազմաթիվ գրքեր, ինչպէս նաեւ կրթական գրքույկներ, որոնք նախատեսված են կիրակւօրյա դպրոցների, հայորդյաց տների, բանակային ու բանտային ծրագրերի եւ թէմերի համար: Այստեղ են տպագրվում նաեւ Մայր Աթոռի «Զրիստոնյա Հայաստան» պաշտոնական երկշաբաթաթերթը, «Էջմիածին» ամսագիրը եւ այլ պարբերականներ:

Հրաչյա ԲԱՆՈՅԱՆ (ԱՐՄԵՆՅԱՆ)
Բանասիրական գիտ. թեկնածու

Ակնարկի պատրաստմանն աջակցելու համար հեղինակն իր խորին շնորհակալութիւնն է հայտնում Մայր Աթոռ Ս. Էջմիածնի միաբան Շահէ Ծ. վրդ. Անանյանին, Հայկ Թաղեւոյանին եւ Արամայիս սրկ. Թաքմազյանին:

ՔՐԻՍՏՈՆՅԱ ՋԱՅԱՍՏԱՆ

Կրօնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Զրիստոնյա Հայաստան»
թերթի խմբագրություն

Գլխավոր խմբագիր՝

Աստղիկ Ստամբուլցյան

Գրանցման վկայական՝ 624

Խմբագրության հասցեն՝

Մայր Աթոռ Սբ Էջմիածին

Հեռախոս՝ 517197

Էլ.փոստ՝ gristhay@etchmiadzin.am
astghikstam@gmail.com

web կայք՝

krishayas.wordpress.com

Ստոր. տպագր. 4.9.2017 թ.

Տպաքանակը՝ 2100
Գինը՝ 50 դրամ